

四庫全書

史部

欽定四庫全書

史部

江西通志卷九

十九

詳校官監察御史_臣左周

檢討_臣德生覆勘

總校官知縣_臣楊懋珩

校對官學正_臣翁樹棠

謄錄監生_臣汪名達

欽定四庫全書

江西通志卷九

山川三

臨江府

閤阜山在府城東六十里山形如閣色如阜道書第二
十三福地漢張道陵晉丁令威葛孝先修煉於此峰
六曰東峰西峰鳳游蓮花凌雲玉女嶺四曰觀舍雞
坑嶠嶺西巘巖二曰金鐘藏錄原五曰葛憩會仙桃

花石曰蠶原石四曰雙鯉馬跡石門朝斗宮曰崇真
潭曰投龍塘曰九龍泉曰漱玉池曰磨劍山中有靈
仙館山北有高峰為丁真人壇他景尚多見宋周必
大崇真宮碑記

章山在府治西晉羅浮道人章昉修真於此有丹池故
名宋宣和中知軍汪師心修後圓月榭得碑石於池
中始知古名富壽岡

瑞筠山在府城南唐歐陽處士董宅有瑞竹色如銀故

名

國朝康熙二年守道施閏章建亭山左既成產紫芝數十本因賦詩紀事以紫芝名亭改山曰紫芝山

龍岡山在府城南十里當驛路有赤土如環者二相去數丈舊傳為龍眼掘土輒雨雨過色赤如初

紫淦山在府城東四十里太平寰宇記作紫金以石色紫翠淦水經其下作金色故名

棲梧山在府城西南三十里有太平玉虛二觀及靈芽

丹井蜻蛙塘蟾蜍谷葛峰筍竹巖真君泉聖水亭諸
遺蹟又西南五里為黃岡山有仙女塔東晉王長史
遇仙女張麗英居棲梧山沒葬於此又西南十里為
福山

孤山在府城西北二十里自縣境至高安界此山獨高
故名鍾秀山與之對峙相去十里山下寺曰查林有
古銅鐘聲極清遠

雲谷山在府城東北二十五里三峰相峙有寺曰龍居

夏山在府城東北六十里上有寺門枕石潭其流不竭
可灌田數百畝

銀嶂山在府城北七十里周十餘里石色如銀故名

鳳凰山一在新淦縣迎春門外宋狀元何昌言故宅一

在縣北五里岳廟前又峽江縣跨城之山亦名鳳凰

楓岡山在新淦縣南十里對學宮挹秀門有瀑水下七

里陂合桂湖達惠政橋入江相近為峽山有霧峰祠

祈禱輒應又有刻木山立廟祀丁孝子俗謂丁蘭也

考宣和二年胡致隆記云丁蘭本河內人見孫盛遠人傳距淦遠廟祀殊未詳

秀峰山在新淦縣南二十里俗呼南雷山相連者為雙峰席帽峰獅石嶺

大羅山在新淦縣南三十二里出雲則雨下有甘泉歲旱里人汲泉以禱

東山在新淦縣東二里有永壽寺宋劉次莊卜築寺前為堂鑿池名戲魚自號戲魚翁有戲魚堂法帖明陳

獻章詩存得舊臨遺帖在摩娑字畫凜秋霜其麓為
練子寧故宅子寧有東山待月歌

秋山在新淦縣東五十里有蘇令祠陳永定中蘇為巴
邱令歿葬於此相近有百丈山唐天寶六載改名豐
城山

尚樂山在新淦縣東六十里上有宋武帝廟禿女岡皇
后陂六尺源羅公坑三百陂諸蹟按南史無禿女姓
氏亦不應既為皇后而鄉里不知姓氏也舊志云結

藕絲為履靈鵲銜至殿前為說尤誕

湓山在新淦縣東六十餘里其山環擁十二峰有紫元洞上有王郭浮邱三仙壇俗號湓峰山出雲則東鄉雨又東為伏泉山上有泉飛空而下舊名石泉山亦唐天寶中改

小廬山在新淦縣北六十里上有石池又有石泉飛瀑四注山周百里南接樂安北抵豐城界

石屋山在新淦縣東北七十餘里巉石如屋廣三丈中

有石山雨暘應禱明王守仁詩遊仙船古蒼苔合伏
虎巖深菴草封山麓有石溪寺守仁詩杖錫飛身到
赤霞石橋閒坐演三車

虎瞰山在新喻縣治南勢如虎踞俯瞰渝水治後有雲
岑山舊建鎮遠樓邑人傳鶚為記又後為登高嶺上
有山如几其巔有亭傍一小阜方正砥平呼為印臺
施閏章詩孤阜荒城內羣峰入望遙

銅山在新喻縣西北五十里山產銅鑛唐大厯後置官

場宋平南唐罷之

鐘山在新喻縣西六十里地與分宜接界裴子野宋略載有洪水浮鐘事已見袁州志內隋時欲於新喻設鐘山府其名本此

三山在新喻縣南三十里東有鐘形山南有周桐嶺西有佛臺嶺三峰並峙宋進士陳大猷居此乃左諫議省華後裔也明陳綸讀書處中書吳筠篆額曰三山書閣相近有貞華山一名薩陽俗呼為雙陽兩峰尖

聳登其巔則一峰獨出邑人以山形如火建北極廟於其上

鼎山在新喻縣南五十里頂有泉常不竭泉傍寺曰頂泉睦宦之水出焉即峽江志所名頂山也宋尚書謝諤讀書其中相傳有野猿聽講

蟠龍山在新喻縣北十里自仰天岡至此山勢蜿蜒如龍石泉清冷可溉田數千頃

瑪瑙山在新喻縣北六十里土色赤白相間若瑪瑙狀

山之陰有雷祠其麓有水月洲馮溪有石梁名曰石步元時里人黎立禮引以為流觴曲水今存故址

蒙山在新喻縣北七十里接上高縣界上有天雲標月光峰彈子嶺風雨潭諸勝山之東有宋司業黎立武講堂其西為西華寺明梁寅讀書講學於中著有蒙山賦

玉笥山在峽江縣東南四十里道書第十七洞天曰大秀法樂之天郁木坑為第八福地舊名羣玉峰漢武

帝時嘗降玉筍於山故名漢梅福及晉郭桂倫彭真
一袁景立梁杜曇永蕭子雲皆嘗學道於此有峰三
十二壇二十四洞六臺十二亭十一泉五池七巖四
石四井四杏花桃花二塢孔君梅君二宅白雲潭飈
御祠名蹟不可枚舉唐道士令狐見堯有專志今失
傳所存者梁杜曇永碑記明羅倫有遊記然未能盡
領厥勝也宋黃庭堅大秀峰詩大秀仙峰菡萏開玉
梁高接九仙臺又覆箱峰詩上天下地似探梯怪石

巉巖視馬蹄朱子飛仙石詩巨靈擘破三千丈西竺
飛來第二峰

鐵雷山在峽江縣北三里上有雷壇即古巴邱鎮山也
黃金山在峽江縣南三十里黃金江上

寶林山在峽江縣西十五里羣岫環擁竹樹陰森又西
五里為雞冠山二石卓立如笏俗呼雙簡石

石洞山在峽江縣西四山皆高江水流其中水口一山
巉呀迴顧土人呼為獅子石明解縉遊此留四十日

乃去李中講學其地有句云霞外問仙翁猶藏學士
筆

安山在峽江縣東南五十里有陳時岳陽王祠墓祠記
云岳陽王墓在玉笥鄉館頭安山地名大溪

東峰在府城東即閣阜山六峰之一也相傳仙翁丹成
藏之石室留記云以俟廣修陰德者明海鹽徐穎詩
明月在天人在雪三更私自禮東峰

綿峰在新淦縣南二十里一名黃檗山唐權載之有黃

槩館遇雨詩

天柱峰在新淦縣東北二十五里兩峰並起名大小天
柱峰又縣東三十里有三峰宋祕閣修撰向子諲薌
林院存焉子諲為兩浙轉運使乞歸高宗親書薌林
二字賜之因屬友人孫覲為銘府志以子諲為清
江人三峰薌林舊屬新淦差可據也

葛僊峰在新淦縣西二十里又西十里為百丈峰俗呼
西雷王文卿脩煉所宋徽宗召王禱雨有應勅立雷

壇北境隸新喻

梅仙峰在新淦縣東四十五里有梅藥鄧葉四仙祠
仙女峰在新淦縣東南七十里唐乾符間李氏女得道
于此鄉人為立廟又名嚴穆山

玉華峰在新淦縣北三十五里俗呼北雷相對者為著
棋峰或云王郭二仙奕處

石梅峰在新喻縣東三十里上有雙巨石俗呼了髻岡
其南為峽江境

白梅峰在新喻縣西北四十五里山出猴筍亦呼猴竹
嶺上有晉習鑿齒廟明詹事習嘉言家其下

石門峰亦名紫雲峰在新喻縣北宗教鄉醴溪三峰秀
聳巨石對峙如門峰北為賜護臺東為神峰西為靈
峰明梁寅讀書于此建石門書院來學者甚衆著有
醴溪記

七層峰在峽江縣東北六十里七峰連絡觀音巖在焉
神嶺在府城東六十里上有嘉惠廟

東阜嶺在新淦縣東十五里上有仙壇明嘉靖間因文廟改設木主乃移供聖像焉

蘆嶺在新淦縣東三十里山蹊峻隘其上建亭明知縣胡之琳詩停車亭下行人絕相對微煙隔樹低

澄嶺在新淦縣北八十里有泉清澈東北隸豐城縣界橫琴嶺在新喻縣西三十里山高而橫枕若琴故名舊產鐵礦官嘗置爐烹煎後廢

圓嶺在新喻縣北五十里自璜緱嶺而來羣峰蒼翠亦

名雕琅嶺其北尤高者為大袁嶺

都督嶺在峽江縣西七里相傳周瑜屯兵於此舊有相
公祠今廢邑人曾櫻辨云攷瑜傳定豫章廬陵留鎮
巴邱則瑜嘗鎮峽無疑但此時僅為江夏太守何以
遽稱都督按陳霸先以大都督討侯景頓兵巴邱尋
發豫章下金陵高涼洗氏告其夫云陳都督極得衆
心則此山以都督稱者霸先也非瑜也嶺下有七里
洞

石牛嶺在峽江縣南十里上有雨潭風潭火潭禱雨雨潭多應若投非其所或激風且致亢暘

白牛岡在府城東三里上有雷祠

菜萸岡在新淦縣北五里上產菜萸

瑒岡在新喻縣東三十里曹學佺志勝云江西有小白花玉潔幽香土人以為瑒花即山礬也

仰天岡在新喻縣西北十五里上有仰山廟廟前有仰天池其水味甘歲旱不竭山半有石梁跨屬西崖號

仙人橋澗中嘗產九節菖蒲明傳玉潤詩石橋幾度
仙人過寶殿千秋帝子居

白竹岡在新喻縣西三十五里山平坦所生惟小白竹
圓沙地在新淦縣西十八里越此為藍塘新喻界櫟樹
地在縣東七十里抵樂安界

上廵中廵下廵俱在峽江縣西抵吉水界

虎瞰巖在新喻縣虎瞰山下巖高百尺石皆赭色有二
泉如目曰虎瞰泉釀酒甘冽

廣教洞在新喻縣北五十里東山上虛敞如室者不一而足所滴石乳成鐘磬花木虬龍之狀石壁多宋元題咏剥落不可讀

龍巖洞在新喻縣西北洲村其洞中虛而釜懸明光透達石乳大者色如玉柱邑人萬年居闢自榛莽遂成勝境

何君洞在峽江縣玉笥山舊志云秦時孔邱明駱法通等十人避亂玉笥山中脩煉歲久皆騎龍上昇惟何

紫霄隱居山洞為地仙何君洞由此名按紫霄當姓
鄧黃庭堅詩九仙乘詔上龍湖盡是驪山所送徒惟
有鄧公留不去松根搯鼎煮菖蒲是一徵也

龍石在府城南元妙觀水濱其狀如龍蜿蜒鱗甲具備
一夕雷震之有竅有紋宛如骨節好事者多取為玩
物

龜石在府城中布政分司前繡衣坊下舊有石轉狀元
生之識宋咸淳甲戌正月朔夜有聲如雷及明觀之

石裂中有白氣薰蒸膚理初軟久始堅

清江在府城南五里袁贛二水合流為清江宋羅知古
詩層層碧嶂來無盡滾滾清江遠莫追於是有清江
碧嶂之名宋末迄元明水勢齧岸屢有甃築以奠民
居明成化末年贛水北衝蛇溪不復西折止有橫河
一綫通其吐納之勢嗣是府城止臨袁江不臨贛江
直至城北二十里外二水復合其勢益張下流遂多
衝決之患

太平江在府城西三十五里出蒙山之陽經華陽江口
流五十里會袁江入贛江

長宣江在新喻縣東四十里其源自璜嶺南流三十
里入渝水環江有五湖之秀

峽江在峽江縣治東贛水由廬陵吉水順流至縣兩崖
峭拔江水束于中而不得逞故名

桂湖在新淦縣治南挹秀門外為儒學外泮又名倉池
明萬曆戊申知縣朱邦禎以水勢徑洩惠政橋於學

宮漫無關鎖率民開濬遶迎春門循秀峰學泮而出
取名玉帶水後令周文議其不便而已成之局亦難
興役復故矣

蓮湖在新淦縣西北四十五里

蕭水在府城西五里又名小陽水源出棲梧山一自段
塘一自烏塘至香田合流而為蕭水

淦水在府城南三十里源出茂林鄉之離嶺經紫淦山
至清江鎮會蛇溪水入贛江

曲水在府城北接高安界自西北又折而東北故名曲水有曲水橋跨其上舊建曲水公館

湄湘水在新淦縣南一里自東三十里高嶺發源經惠政橋入贛江

泥江水一名泥溪在新淦縣南十里源出撫州樂安界流經縣境入贛江

金水在新淦縣北小廬山西經廬陂西流出石口入江藍陂水在新淦縣西八里源出百丈峰下蘆溪至黃荆

渡入江

逆溪水在新淦縣西十里出源頭經南坑湖田橋入江
淦水在新喻縣治南一名秀水其源出袁州萍鄉之蘆
溪經縣境凡九十九灣八十八灘下抵清江

睦官水在新喻縣南二里出鼎山北流三十里入淦水
同水在新喻縣南八十里自袁州分宜之同村閭嶺東
流入縣界經黃源一百八十里入安福縣界合贛水
距河水在新喻縣東北出分宜之洞村有兩源一涂塘

一龍塘合距村南流三十里經通濟橋合渝水

板陂水在新喻縣西四十里源出分宜界流縣境又三十里入渝水寰宇記所謂五浪者即江口之合流處也

亭頭水在峽江縣西三里源出七里洞環城北經新田大安橋入峽

漚水在峽江縣北二十里合新喻界頭水東流入清江一名烏口漚舊志作漚

豐水在峽江縣南三十里西北流入峽又縣南黃金水
自新喻界東流入斷金鄉九十里入峽昔有人窮水
源見沙中有金採以歸後往尋之不復見事類編云
漁人網魚得一金鍊忽見金牛湧出挾鍊而去以斧
截得數尺皆精金也因名黃金江

踏石水在峽江縣西南自吉水界巷里流經員嶺黃金
江入峽有大石亘江中石上足跡深寸許傳為張果
仙蹤

蛇溪在府城東其源自永泰下五里分江水為溪三十里復與江流合此即銅鑼江水也昔時春夏水泛瀰漫數十里民不可田宋淳熙初築堤捍之患始息明成化末贛水暴至徑北衝蛇溪遂成大江田土沒入於水幾千百畝嘉靖間參政陳大賓知府徐灝先後議塞不果

沉香溪在府城北即閤山水也左界水會淦水至鎮入江右界水出沉香溪南流又東折至豐城界小港口

入江

秀溪在新淦縣東北二十里達于江

蓮花潭在新淦縣南三十里潭畔有巨石狀如蓮花

龍潭有二一在新淦縣吳山嶺一在新喻縣龍塘岡下

讀書潭在新喻縣西南十五里唐盧肇讀書鐘山嘗扁

舟溯洄寓居潭上

驄馬潭在新喻縣東三十里潭上山勢馳驟如馬水深

魚聚漁者利之

蕭灘在府城西蕭水中亦名蕭洲梁武帝南幸曾駐此
又呼判官灘宋王益判臨江軍官吏懷欺求判益輒
閣筆不行以比涉蕭灘者用腐舟則必敗也

苦竹灘在峽江縣北即廣州刺史蕭勃遣將歐陽頔屯
兵處今名甌篲灘

金鳳洲在府城文明門對岸形如鳳古識云金鳳洲圓
丞相出是也宋黎立武建有金鳳書院今廢
國朝守道施閏章作來鳳亭於其上有讌集詩

萬碩洲在府城南十里上有柑園最盛其地則清江新
淦各隸其半與萬碩相望者為游家洲袁江自西折
北而洲在其右掖故又名雙洲稍北為中洲長二十
里廣半之

木瓜洲在府城東北三十里又花艷洲在清江鎮前涼
傘洲在清江鎮下

大洋洲在新淦縣北四十里有英祐侯蕭公祠

紫洲在新喻縣治南文昌閣下與東瀛洲相連大水不

沒明萬曆間參政施天德建塔于上珠洲在縣西南
二十里畫江中

萬壽洲在峽江縣玉峽驛前其上有古成子廟圯於水
鐘沉水底為行舟患舊名成子洲後改今名

玉澗在峽江縣一名玉溪源出玉笥山迴互紆曲號三
十六澗流出縣東北十五里為玉澗橋俗傳漢武帝
時有玉梁墜澗至獻帝時化龍飛去

鳳池在新喻縣鳳凰門外深廣不數尺四時不竭水清

甘

洗墨池有二一在新淦縣治東舊傳陶侃讀書處一在
峽江縣玉笥山相傳杜曇永學道於此嘗鑿池洗硯
故名

醴泉在新喻縣西三十里宋黃庭堅嘗過飲之而甘曰
惜張又新陸鴻漸輩不及知也因題其傍石柱曰醴
乳以泉釀酒醇美殊常

環溪泉在新喻縣北崇教鄉地名山灣每歲旱則泉湧

而流廣漢泉在縣西北長樂鄉地名漢下山隅巨石
屹立中虛如屋鄉人號為石屋其下水源與漢泉通
雖大旱流旣不竭

落星井在府城北門外

劉仙井在新淦縣南十里峰岡山舊傳仙人劉守真煉
丹井其泉清甘病者飲之可愈

丹井新喻縣有四一在仙馭觀一在延真觀皆許旌陽
煉丹處一在善應觀為羅陳二仙遺跡一在百丈峰

為葛仙遺跡

九星井在新喻縣治內相傳鑿井時泉涌出有浮漚若九星隱映其中

吉安府

青原山在府城東南十五里山勢鬱盤外望如蔽旁有徑縈磴而入度待月橋石壁峭倚其中曠衍淨居寺在焉山半蹊稍平有卓錫泉在七祖行思塔左虎跑泉在右其後為雷震泉三泉之外又有名龍井碧乳

者獅象二山左右拱立駝峰鷓鴣嶺巒巒絡繹蓋天
然勝區也唐顏真卿曾題祖闢二字宋黃庭堅書碑
凡八石今嵌大雄殿壁青原山三大字文信國天祥
書明嘉靖間鄒守益歐陽德羅洪先輩宗陽明致良
知之學春秋于此會講乙卯歲鄒元標郭子章移會
館于翠屏山之陽建五賢祠

國朝康熙甲辰守道施閏章會講山中摹顏書祖闢二
字建右坊更書聖域二字建左坊祠前建傳心堂翼

以二樓左曰仁樹右曰見山藏書以待四方來學者
青原向無山志釋大然輯成志略凡十三卷

東山在府城南龍興坡上負隍面市舊祥符寺有仁壽
塔世傳唐天祐中一夕風霆其塔忽左旋東嚮因呼
神運塔宋黃庭堅有記後改建儒學又吉水縣東二
十里亦有東山繇亘二百餘里漢劉智請移郡謂東
通大山者即此

相山在府城西即西原山平行幽曠唐杜審言司戶吉

州結相山詩社宋周必大罷相歸與故舊憩息於此
構司戶祠明陳嘉謨輩置西原會館買田以膳來學
之士今廢

仁山在府城西二里城隍岡側梁書天監五年高昌之
仁山獲銅劍二廬陵在梁以前為高昌即此山也吉
水縣東北亦有仁山以山形似仁字而名

神岡山在府城南十里舊名翠峰高三百丈迴環五里
上有惠祐廟祀陳太守劉竺因其顯赫故名

瑞華山在府城北五里俯瞰大江上有瑞華觀明王守
仁令廬陵時遊此有松古尚存經雪幹竹高還長拂
雲梢之句相連者為真君山巖窠倍之宋時有蛟為
患因祀許旌陽得免遂以名山

螺子山在府城北十里與神岡山對峙南臨贛江宛委
如螺無林木舊志云昔有漁人遇風雨見神螺光彩
五色取而懷之至山下涉水螺失所在歐陽守道作
靈泉寺記又云掘地不盈尺輒得金螺無數大僅如

珠而形奪真

天華山在府城西六里許舊名鳳山相傳嚴陽尊者說法西峰感天雨華乃易今名上有天華觀前一小山狀如覆蓋明嘉靖間太守余之禎建亭曰見曉今廢金鳳山在府城南二十里永和市東形似鳳故名

娑羅山在府城南三十五里狀類人俯身又名拜相山歐陽氏聚族於此又南為香城山繇亘百餘里南北麓界永豐吉水高數百仞三峰筆立中一峰尤奇秀

其下為宋胡忠簡銓故居

文山在府城東五十里下臨大江文信國嘗觀大水於此有記與文山相對者為天馬山宋義士鄒彥明刵半山書院以居學者周必大嘗寓講焉既貴為之記其右為東門山宋景定間義士鄒馮率鄉人立柵茲山以避寇

龍須山在府城西五十里唐一登禪師嘗駐錫於此代宗時土人龍須建法雲菴因名或云水之濛洄曰須

須誤須也曹輔送周吉州詩龍須山對殷侯池池面
山容兩清絕

國朝順治丙申歲有鳥千百翔集山上一大者中立餘
環拱之不鳴不食一宿而去或以為鳳凰云

武華山一名了髻山在府城西去梅溪十五里峰巒疊
秀其麓有泉雖旱不竭禱者嘗於石下投符必得雨
因呼龍王崖山有寺面木魚峰寺背流泉頗似匡廬
三疊邑人李天材有記

觀山在泰和縣西十五里泉流千尺冬夏不涸黃庭堅
有觀山千尺夜泉冷之句相近為金華山其脈自武
山連亘至此與玉華山埒秀

武山在泰和縣西三十里一名新山勢如躍馬蓋縣之
主山也山有武婆岡世傳武姆飛昇處又有陶皮石
室龍王洞珍珠泉虎鼻峰望陽石禮斗石衣籠石南
崖石西崖洞石鼓丹井雲峰寺佑仙觀十四景詳見

明劉崧遊記

傳擔山在泰和縣西五十里山極高峻非攀援不可度
西南有石筍峰尤峭拔下有九龍潭又有玉溪泉凡
四十八竅至巖前合為一因名六八泉產茶味極香
美世傳溫道者所種相近為潮山唐四祖禪師結菴
山巔菴成江水逆流聲急若潮故名山有通天巖四
祖巖其巔有唐則天時舍利塔方址七成亦見劉崧
遊記又西十里為高湖山

三顧山在泰和縣南五十里宋元嘉中盧度隱此屋前

有池其池魚以名喚之則次第來取食宋徽宗時蕭
楚自號三顧隱客嘗築讀書臺以春秋授胡忠簡銓
沒後私謚清節先生山中有洗馬池龍潭南巖三竅
泉諸勝相近有山曰雙鳳以其兩峰相連秀拔如鳳
也

大唐山在泰和縣南六十里勢如羣馬交馳上有大唐
寺

王山在泰和縣東八十里狀如卓筆高二十里周迴百

餘里晉永嘉中王子琰隱此修真因名唐貞觀初匡
智與兄子大郎求仙至廬山遇異人曰此陰山也不
如南求陽地入此山得仙故又名匡山山有十二景
曰送龍潭釣魚臺駕鶴峰禮斗壇煉丹井衣冠塚圍
基石讀書巖通仙橋白蓮池崇元觀滾泉池餘見胡
忠簡銓記

蟠龍山在泰和縣北三十三里山勢委宛若龍蟠

禾山在泰和縣西北五十里唐時嘗生嘉禾故名禾邕

二水出焉九月間山產浮筍味佳

甘露山在吉水縣東二里舊名虎邱山宋紹興初有甘露降因名又東一里為太平山上有許旌陽祠賽禱者無虛日又東二里為鳳山上有鳳皇巖瀑布自巖達于江縣南有張華山石洞流泉洞口有玩龍亭

中華山在吉水縣東二十里衆山環擁一峰秀出如懸鐘有浮丘王郭三仙壇禱雨輒應

天獄山在吉水縣南五十里一名黃原嶺相傳此山鎮

伏奸宄上有地方廣丈許履之覺下虛如鼓聲俗謂之鬼監故曰天獄

國朝康熙十一年山有二虎為民患縣令檄於城隍越數日其虎斃於山穴

西山在吉水縣西南八十里重岡疊巘若屏障然其間一峰獨尖秀曰望火樓下為朗溪又安福縣西南二十五里亦有西山其下龍窟歲旱應禱

崇義山在吉水縣北二十里有南岡禪寺其寺僧皆守

清規衣服相傳飲食相讓故曰崇義

朝元山在吉水縣西北五十里有方石點如金名黃金臺

南山在吉水縣北六十里山阿數石屹立號石人峰下有宋儒王子俊振古堂相近為望符山世傳旌陽令許遜於此望符

崆峒山在吉水縣西北九十里山多黑石能化為白每化一石其年輒有擢科者

龍華山在永豐縣南五里晉有龍華真人於此得道舊志云東漢桓帝時上苑白鹿遺落人間常見於此後人就其地建白鹿觀今改為鴻都觀

西華山在永豐縣西五里山形類覆鐘有浮邱王郭三仙殿歲旱應禱縣西三十里有寶山聳秀可挹

陽山在永豐縣西北十里相傳葛仙翁於此煉丹上有集靈觀丹井亭

嶽山在永豐縣北十五里五峰森列上有凌空閣寓仙

館注生堂文昌祠明崇禎間擴注生堂為長春殿亦
浮邱王郭三仙香火也

雞籠山在永豐縣東北四十里四面田疇此山獨蹲其
中宛若棲雞之籠

香爐山在永豐縣東四十里以形似名又東四十里為
郭山連樂安新淦二縣界

五勝山在永豐縣南一百里五峰連聳上有石竈其罅
有水流入莫知所出

鳳凰山在永豐縣南一百六十里宋歐陽修考妣墓在
焉即瀧岡阡也左為修之故居右為修之前室胥楊
二氏墓其前有西陽宮傍有沙溪市市有寨相近有
沙山一名杉山舊有福興廟文信國父儀嘗謁山乞
靈題詩於壁有紅日麗天掀霧幙白雲歸洞見山屏
之句

蒙岡山在安福縣東里許一名鳳山又名秀峰林木森
茂舊有明尚書王學益書屋王守仁為之銘縣北二

里北華山一名玉箱山上有菴山頂方便於登覽
麟山在安福縣東十里一名冒石山突起江濱石峙如
麟角里人副使周憲居其下憲未第時治尚書夢茲
山神告曰居我山曷不讀我經乃改治春秋遂得第
子懋卿懋相世其經皆第

浮岡山在安福縣南十餘里層峰疊嶂有洞虛觀閣黎
峽峽口舊有古松一株上有石如龍骨熬之微腥又
有桃花洞芙蓉嶺菡萏峰姚崇讀書臺

天臺山在安福縣南二十里有石礪石磴觀音崖相傳
葛仙煉丹處西山有蟠藤古廟宋王庭珪記之又南
十里為玉荆山相傳晉時有人犁田得玉因名又南
十里為三峰山卓立雲表西北有長磐洞石鉢泉南
有小石屋劉陽題曰半雲洞天相近有書岡山兩峰
屹立上有平臺相傳陶潛讀書處也

青岡山在安福縣南五十里高峰如旗幟小峰離立里
許如碁布梅點相傳為桓修疑塚

斑竹山在安福縣西十里有菴產斑竹竹下有斑魚池
相傳魏夫人於此煉丹石上爐竈宛然王庭珪有記
新茨山在安福縣西五十里漢豫章太守賈萌與安成
侯張普戰于新茨之野疑即其地

胡仙仰山在安福縣北四十里其高峰曰黃公洞有泉
曰真濟又北二十里為鵠湖山上有雁峰白鶴峰石
人峰三渡橋桃花澗

月山在安福縣西一百里山頂有石如月下有月山寺

又西二十里為高峰山山徑峭險上有龍潭三禱雨
必應

武功山在安福縣西根盤八百餘里跨吉袁二郡界接
長沙最高者為白鶴峰相傳有武氏夫婦遠來脩煉
夫止盧蕭婦止西昌遂以武公名山故泰和有武姥
山云及陳武帝時山神陰助王師平侯景之亂更名
武功高踰三十里中夜登頂可望日出峰上有壇以
巨石疊方丈許其瓦用鐵祀葛仙於壇內傍有石塔

時見火焰若金燈然又有煉丹池泉冬溫夏涼滾滾
不絕求嗣者於激流處掬水得圓石則宜男山脚有
集雲菴半山有箕峰菴南有圖坪菴昔有異人遊此
潑墨於門壁間忽不見洗之見詩一首行草書甚奇
墨刻至今存或以為白玉蟾云宋李廉明王直劉陽
皆有遊記邑人張程輯武功山志自武功絕頂行十
五里為九龍山萬峰環遶林木翳鬱相傳劉蓬頭結
茅山中明嘉靖間有僧自安仁古爽來創建佛寺詳

九龍翰墨志

蹲山在安福縣西南一百四十里上有風窟繚繞百餘步無草木每有風出飛沙揚塵又西南十里為更生山輿地志云吳時有女子居樟木下木大數十圍孫皓遣人伐之斧斤莫克丁夫苦之女祝曰汝今且去他時更生遂克之後果復生山下有更生夫人廟盧蕭山在安福縣西二百二十里接袁州萍鄉界山頂二水瀘水東流注鄱陽湖瀟水南流注洞庭湖或云

盧蕭二道人結廬峰頂因以名山者非也

金山在龍泉縣西一里形如金字與銀山夾峙形家以縣名龍泉二山為龍之雙角銀山在縣東一里山巔有塔

錢塘山在龍泉縣東南六里山壤衍沃其下有徑通南康縣又東南四里為玉泉山泉出石罅潔白如玉故名

西龍山在龍泉縣西二十里頂有風穴相傳昔有異僧

暑中謁民家求飲弗與僧拂衣去以杖觸山頂石罅
風大作俗呼西龍風遇霜夜怒號尤甚陰雨則息有
樵者以土石塞其穴乃自山下潭中出波濤洶湧久
乃復故

石含山在龍泉縣西一百五十里延袤數百里跨永新
及湖廣桂陽茶陵境右溪水源出焉

芙蓉山在萬安縣西五里山形秀麗超出衆山宋周濂
溪過其下歎曰芙蓉山何減文章嶺耶其門人因賦

錦繡湖邊徵理學芙蓉山裏見文章之句

龍頭山在萬安縣東二十里高數百丈山如几案又名
案山上有仙壇嶺及仙聖羅漢二巖擣藥臼仙人跡
巖臨溪水溪中有大小石鑊東注黃龍潭西注龍溪
蕉源山在萬安縣東四十里山形尖峭樹木鬱茂舊產
鐵一名東溪山又東四十里為西平山三面懸崖惟
西南平坦梁水出焉

韶山在萬安縣西北四十里俗傳虞舜南巡嘗奏九韶

樂於此有舜祠今廢

金牛山在萬安縣南六十里東瞰大江有石如牛建金
牛廟又縣西南八十里有五馬山其峰相連狀如五
馬

東華山在永新縣治東下有澄潭及金星石縣東南五
里有大洪山一名花斜嶺

義山在永新縣東南二十里西交郴廣南控虔吉峰巒
相顧若有長幼之序故名唐天寶初嘗改名永新山

有聰明泉宋劉沆詩義山山下有靈泉泉號聰明自
古傳山下有梅田洞前洞泉石較勝後洞明劉崧有
遊記其南有雙巽文筆二峰與義山相連者為南華
山勢如飛鳳相傳仙匠智棲化其中今有仙壇瀑布
泉疏磯洞仙人壟仙人牀明正德間同知朱袞鐫南
華天秀四大字於石壁

綏原山在永新縣南四十里勢連永寧鵝嶺其上有阿
育王塔佛書稱舍利塔八萬四千此其一云

高士山在永新縣東南五十里昔有高士宅其麓後人置菴尸祝之水陰為漿坑黃庭堅有詩

秋山在永新縣西北六十里勢接衡潭周迴數百里亦名禾山旁有石崖瀑布直下盪為深泓顏真卿為吉州別駕曾遊此大書石上曰龍溪山有七十一峰最幽者為赤面峰昔有異人居此存一釜徑丈許半瘞土中

後隆山在永新縣北宋相劉沆祖景洪居此

拔鐵山在永新縣西南一百餘里分隴而下在南為雞冠巖在西為更鼓寨與龍泉縣接界

漿山在永寧縣西三十里峰巒峻峭有泉味甚甘上有蜀先主行祠

小玉筍山在永寧縣西四十五里周迴二十里臨江有玉筍山此故名小玉筍南唐孟賓于隱此號羣玉峯
叟有泉味香美

拐湖山在永寧縣東南六十里上有泉自山腰湧出直

瀉山麓蕩為深湖

迎岡山一名銀岡在永寧西北五里中有石潭歲旱禱雨于此又縣西北三十里有小江山

金竹峰在府城北六十里高三百餘丈兩峰對峙如竹文筆峰有二一在府城東南百二十里廬陵縣之淳化鄉宋文信國世居也一在廬陵永福鄉淡江蕭氏居其下

螺髻峰在泰和縣南四都秀巒如髻髻狀

吳峰一名青螺峰在吉水縣東南五里又縣西十五里有午岡峰一名斗峰五岡連屬一峰獨高世傳楊善飛昇處上有仙師廟所遺白角每旱禱吹之則雷雨隨作

蓮花峰在吉水縣東六十里峭壁萬仞松杉森蒼中有池產白蓮花又菖蒲生水中經冬不彫十年一花人欲採之者入池中竟迷不得壁上詩相傳呂仙所題今漫滅矣

鹿角峰在吉水縣西北六十里相傳有仙人騎鹿經此
又西北二十里為三四峰上凹之山壁立有石高數
尺相傳此石生光必有中科第者遂名石鏡中凹為
南北通衢下凹臨赤石潭有黃雲岡祠旱歲應禱

一峰在永豐縣南七十里舊名飛孟峰孤巖秀矯明羅
文毅倫取以自號

東陽峰在安福縣東十里磅礴高聳四面形體各殊頂
有巨石可坐數十人時出雲氣居人望之以占晴雨

西有石巖如屋舊刻石屋洞天四大字土人祀唐令
劉像於中後徙洞傍其南為白雲峰一名白馬峰下
有葛仙壇壇下有泉流入蜜湖

石榴峰在安福縣東十五里俗名龜山狀若龜之渴而
飲於江下有龍潭深不可測元時有漁人沒水誤入
洞中石牀卧一老人蓋龍所居也

雙乳峰在永新縣西皂旗山之右其麓有顏詡墓

七星峰在永寧縣北一百五十步縣西十里有娥皇峰

雲騰嶺在府城西三里山勢屏列於長岡之外相傳唐刺史吳世雲升仙於此下有噴珠泉

九獻嶺在府城西南十里沙嶺以達高沙合九峰而名畫眉嶺有二一在府城北真若山後平行可五里許

國朝順治三年大兵破古城屯營於此一在廬陵縣北五十一都石如碁局名仙石山其下出泉可溉

廖仙嶺在府城西南六十里山勢盤折又名曲山蕭氏世居其下有石崖世傳唐會昌中廖仙姑棲神崖

內里人有禱必應又甌蓋嶺之北有名麟嶺者形似
麟高百餘丈東陂環之明蕭弘魯有遊麟嶺記

登科嶺在泰和縣西北五里舊名燈窩宋劉廷雋居其
下擢第改今名

減飯嶺在泰和縣東三十里濱江形如偃月遇江漲則
漸傾減俗傳此山日減則民食足故名

城頭嶺在泰和縣南四十里上有獅子寨下有蛟潭又
南為閬川嶺劉崧詩一洞深連三十里兩崖高聳百

千峰

分水嶺在吉水縣南四十里文昌鄉又南四十里為穹嶺因與西山對峙亦名東山

楊梅嶺在吉水縣東五十里出楊梅味類揚州又東十里為韓相嶺世傳南唐韓熙載曾遊此

王嶺在吉水縣北九十里絕頂有石壁高數十丈下有小巖高可五六尺歲旱鄉民於此禱雨將盥薦輒有微溜出石崖上亟以器貯之水多則雨隨至其側有

嶺名范蕭世傳范蕭二人學道於此

獅子嶺在永豐縣南三十里上有巨石如獅舊傳有僧號禪和大師結茅其上後凌雲去相近者為聖嶺上有井深廣數丈前有峰曰仙人臺

白芙嶺在永豐縣西四十里又名白霧嶺抵吉水界石空嶺在永豐縣南一百十里形如覆斗空闊可容二三百人其上為古寨場

羊角嶺在安福縣西五十里一名煬岡山上有仙壇龍

洞洞秉燭可入數十步水深莫測又有達仙卧石錫杖跡其下有潭巨石如石鐘倒垂擊之有聲其北為龍雲嶺宋劉弁居其下著龍雲集縣東南有黃牛嶺上有三仙臺

西雲嶺在安福縣西一百二十里山勢聳特世傳鑒義禪師於此化去遺銅印一枚一刷可度十數紙

鵝嶺在龍泉縣西四十里勢插層霄有飛雲洞集雲峰石人峰仙鵝池金龜石老蛤石諸勝元初立永寧縣

治于嶺之西界

蓬萊嶺在龍泉縣北五十里多勝境人謂如海上蓬萊
金船嶺在萬安縣西南六十里昔傳胡僧過此知有神
物掘地取金船而去

藤嶺在萬安縣東南一百里路通黃塘

千嶺在永新縣西四十里

七溪嶺在永寧縣北十里長可二十餘里林木交蔭有
泉流為七溪三十六洞

弄心嶺在永寧縣西北七十里與湖廣茶陵州接界縣西南五十里有楓溪嶺與湖廣鄱縣接界

美岡在府城桃花巖之南碧溪挹流南峙石壁松檜蒼翠勝槩頗多

天柱岡在泰和縣南二十里形家謂之南方天馬

日岡在吉水縣北四十里廣數丈其圓如日相距五里有月岡狀如偃月

五里岡在安福縣南五里一名龍岡晉郭璞安復遷城

記云鳳山龍岡狀元文章

貞女岡在龍泉縣東北三里上有貞女墳

雲岡在萬安縣東北宋慶元間遷儒學於此

桃仙巖在府城仙城嶺下石洞虛明可居百人石樓上

聳古柏蒼然

石屋巖在廬陵縣二十四都從大穴入中如廳事可容
三百人石天成如闌干毀於紅巾賊巖口出泉經旱
不竭

十龍巖在泰和縣南四十里空洞可容百人中有龍井
清水巖在泰和縣北五十里其廣可容百人深無底世
傳一道人入其中有石燕飛來撲人度行十餘里聞
有撒網聲懼而還又縣東王山之半有讀書巖形若
丸甕可容二十人世傳匡仙讀書處

般若巖在吉水縣東南九里廣丈餘相傳般若大師學
道於此又縣南八十里有洞巖產龍鬚草又桑洞山
下有仙女巖元大德三年立王郭邱三仙壇靈跡甚

著

教授巖在永豐縣南八十里武岡教授羅開禮幽棲處
里人重羅死節故以官名巖

白水仙巖在龍泉縣九都上有三瀑泉

黃塘巖在萬安縣東南八十里
有洞碧空玲瓏名通天
石室下有玉乳泉可溉田千畝

花石巖在永新縣千嶺之半勢甚奇峭又西為長春巖
金洞在泰和縣二都山勢縈迴約五里許日出照耀鮮

明如金亦見廬陵縣志

東綿洞在泰和縣南四都一名東沔以沔水所出故也
洞西又有高龍洞洞南為老虎坳洞北為鷺鼻峰

黎洞在吉水縣東五里黎王寨下洞中皆良田溪水極
清縣南五里有神洞入徑最狹依山俯澗略可容足
不百步即寬平有良田百畝許兩山合翠峰高入雲
洞中有石棺石爐之屬

鷓鴣洞在吉水縣西北五十里四面山皆環合中分南

洞西洞有田數百畝多鷓鴣南唐時盜吳光據之今
其地猶有馬家營鼓樓洲又西北十里為石蓮洞磐
石屹立可三四丈中空如屋洞口有羅漢松枝甚奇
古如虬龍然其洞本屬虎穴明羅文恭洪先手闢榛
莽自題梅關二字又書虎豹關三字其後虎絕跡焉
洪先於洞南建正學堂有石樓閉關諸詩講堂久廢
國朝康熙五年守道施閏章有志興復之嘗著遊記二
其夜宿題洞門絕句云古木蒼藤老未枯洞門幽鳥

自相呼白雲不記人來往誰似當年舊主無

金牛洞在永豐縣南二百里許境幽人寂中有書院明
羅倫所構也

石城洞在安福縣西一百三十里石勢環抱如城舊志
因劉弇遊永新石廊洞詩沿謠襲舛里人劉元卿改
定今名洞由小竇秉燭入澗水中流有觀音崖石鐘
石鼓石田諸名勝前後空曠可五里俗呼書林洞

寶仙聖洞在永新縣東二十五里洞深數百步內有石

柳石龍石鼓石碁枰之屬有二石對立若童子方石
若書案俗呼雙童講書石世傳唐天寶間有言洞藏
妙寶眞符者明皇命張均等祠求之其陽為玉虛洞
右為合璧洞

石廊洞在永新縣西北一百里洞深一二里中有白石
幢石鼓石檠石蓮花距石廊十里為元陽洞清泉湧
出旁有元陽觀世傳唐相姚崇讀書其中故山稱書
堂嶺其下有墨池元提舉李祁嘗棲隱焉又名鳳凰

臺

石屋在府城東南八十餘里山臨大江石屋架虛者二
漁人避雨嘗泊舟其下江漲則水彌之

石倉在永豐縣南一百十里中空如螺旋上有石牀
苦富峽在吉水縣南四十五里兩山相對如峽居民力
耕而富庶故名

芙蓉峽在萬安縣十八都葉塘下寺背舊有出鹽石壁
可供日用寺僧利其多出鑿石寬之鹽遂絕有花如

芙蓉四時間開移之他境不復秀發趙悅道云峽與
繡毬山皆以花命名景色殊絕

洛陽峽在永新縣南三十里峽勢險絕比於洛陽伊闕
釣臺石在府城青原山淨居寺南氣象甚古黃庭堅與
周元翁遊此賦詩云邈世一邱壑似漁非世漁

仙人石在府城方石嶺北和風坑口有山磅礴狀如覆
鐘石壁上墨楷書朱草書各數行又馬嶺之上有人
石二石屹如巨人一為雷碎有東西泉溢出西人禱

之虔東即澀東禱亦然

牛眠石在吉水縣西北四十里方廣丈餘舊傳夜靜時
有金牛現跡

試劍石有二一在吉水縣北五十里元潭觀後相傳許
旌陽以石試劍其劍留觀中長僅尺許非銅非鐵一
在安福縣北桑田相傳劉像為今時試劍於此

螺絲石在安福縣江汊潭四周水繞形家言不可塞也
贛江在府城南原本章貢二水北流至贛縣為贛江三

百里至萬安縣十八灘屬萬安者有九曰崑崙曉武
索匡坊小蓼大蓼綿津漂神黃公水性湍險惟黃公
灘為甚東坡南遷訛為惶恐舟過此其險始平趙抃
守虔州時未置萬安縣地尚隸虔嘗疏鑿惶恐以上
諸灘按陳史贛水舊有二十四灘多巨石陳高祖發
虔州水暴漲高數丈三百里間巨石皆沒今止有十
八灘云折而東六十里經泰和水愈清澈故曰澄江
東北流八十里經廬陵縣界以達府城又東北四十

五里經墨潭而下吉水過臨江至南昌入鄱陽湖

雲亭江在恭和縣南一名縉水源發興國縣界西北流

至珠林入贛江

僊槎江在恭和縣東源發興國縣界小密嶺西北流其間有大蓬江水仁善江水皆經此入贛江

盧江在吉水縣南源出永豐縣界合上盧中盧之水西流為盧原又西北流為盧陂灌田數萬頃又北入義昌水

恩江在永豐縣治東南舊名瀕水合麻江龍門江諸水下流入贛江由漢孝子歐寶救虎得名縣舊為報恩鎮水曰報恩江

王江在安福縣東南一名洋口有龍陂四鄉會水處也皂口江在萬安縣南六十里其源出贛縣三龍經上造下造而流入贛江又南二十里為梁口江其源一自霧團一自龍頭合於游田溪

韶江在萬安縣西北三十里其源自西韶來下流入贛

江入西北三十里為射洲江源發龍泉縣界經泰和
合牛吼水入贛江

城江在萬安縣北六十里其源自蕉源山發流經南州
觀合盧源溪從兩江口入贛江

溶江在永新縣東二十里合禾水琴停勝業茭川諸水
經府城入贛江

螺湖在府城東北源發城西五里岡冷水坑流經雲騰
嶺下與沸泉合北折而東注為螺湖通贛江里人周

思東詩螺湖湖畔盡人家雞犬聲中度歲華

郎湖在府城永陽市上游劉崧有長歌乘月過郎湖句
鑑湖在吉水縣東二里地讖云青湖水決鑑湖弦文江
出狀元明洪武庚辰胡廣應讖正統壬戌劉儼復應
之

東湖在安福縣治南三峰下地名厚霄舊有道院每雞
唱鐘鼓自鳴後陷為湖又書岡山之西有鴨翼湖

蜜湖在安福縣東十五里輿地志云湖產絲蓴鯽魚有

石蜜可容百人其魚味甘如蜜故名

神岡山水在府城西南其源有二一自袁州萍鄉界瀘
瀘山百八十里至安福縣東北流八十里與永新水
合一自永寧之漿山鷺嶺二水通永新江其間又有
永新之抱陂水琴停水黃陂水泰和之邕水禾水安
福之郭水毛停水清溪水更生水皆經此入贛江
橫石水在府城西北廬陵吉水之界一發廬陵儒行鄉
一發吉水中鵠鄉又有清湖水三江橋水皆經此入

贛江

牛吼水在泰和縣西南源出永新拔鐵山其間有蜀水
禾溪橫江諸水皆經此入贛江

吉文水一名字水在吉水縣南贛江下流與永豐水合
曲折於灘洲間狀若吉字故灘曰吉陽縣曰吉水其
上有墨潭以水深黑而名

同江水在吉水縣西北六十里源出袁州分宜縣界受
楓子江柿陂何湖石水同入贛江

明德鄉水在永豐縣南從西北流經沙溪瀟瀟出廬陵
張家渡以合贛江

白水在永豐縣西三十里自帶源流出歷九峰有瀑布
泉下匯為潭中有石龜浮出即雨流至羅富橋合恩
江

盧水在安福縣城北發源盧蕭山距縣一百八十里自
武功東流合洋澤水遶縣北與王江合又東會永新
縣水歷神岡山下入贛江下流與廬陵清溪合又名

廬水

閤水在安福縣東三十里其源出閤嶺東流合毛停水入王江

遂水在龍泉縣南其源有左右二溪左溪之源一出自柳之桂陽堀渡一出自南安上猶之大林至南江口始與右溪水合右溪之源出自衡之茶陵沅陽經雙溪坑至西溪口由渡口而東歷八十四灘乃入贛江蜀水在龍泉縣北一百二十里源有二左源清湛右源

稍渾流至金田始合東經泰和瓦窰入大江

蜜溪水在萬安縣東南出鷺公嶂下

秀水在永新縣西南入縣分兩支遶縣舊學轉北入江
形若秀字宋縣令侯彭老濬之後湮塞縣令柴必勝
又濬之每濬科第輒倍他時諺云東陂交西陂迎取
狀元歸今塞為街市歲久迄不可復

勝業水在永寧縣城南源出縣東境鷺嶺山腰下流合
永新縣芟田水

富川在府城南水自贛州興國而下曰富川宋文文山
集中有富川酹魁星文

義川在安福縣南其源發萍鄉縣界合湖廣攸縣水達
永新流經廬陵神岡山水性奔騰善潰決歲齧民田
無算明天順間鄉民劉岳捐資鑿石數十里水患以
寧兼利行舟守令交旌之名其川曰義云

習溪在府城南興賢門外源出吉塘渡流入贛江

文溪武溪俱在泰和縣治西又縣西一百二十里有湓

溪東合禾水流經神岡山下

梅溪在吉水縣東北三十里溪傍多梅樹故名

葛溪在永豐縣治西以葛仙丹泉所出故名

智溪在安福縣治北源出袁州宜春縣界桑田東麓合
荷溪水入盧水

龍溪在萬安縣東源出龍頭山八景之一宋滕達道有
詩縣西南有綿津溪其源一出雙坑一出長仙合流
五里入江水性柔故名

黃土潭在府城紫瑤山下有龍潛焉宋文儀嘗夢潭中
龍即其居隨產天祥雲霧暝室潭日淺塞既死柴市
土人復夢有乘輿擁入潭中者旦大雷電風雨潭漲
如舊

分獅潭在府城游獅嶺下二獅隔潭立故名

花石潭在泰和縣東北三十里日色映石燦爛如花

雙絲潭在吉水縣東三仙壇後相傳用絲千尺繫石投
之方及潭底中有龍禱雨即應縣西四十里石牛潭

相傳江水暴漲見石牛浮其上

三姑潭在永豐縣慵嶺之北方廣七丈水源自暗潭來
石鼓潭在永豐縣南一百六十里世傳內有石鼓擊之
則可致雨

紗帽潭在安福縣武功山其水從迎仙橋橫流一石硯
懸注潭中潭口如紗帽也雲氣昏黑相傳有龍出沒
百花潭在安福縣西一百二十里盧蕭武功之間峰巒
秀拔雲嘗覆之花木滋盛歲旱可禱雨

虎潭在龍泉一都右溪中潭上山阜屹立如虎其水深黑多產巨魚

神潭在萬安縣南五里惶恐灘上潭水清深觀魚輒見兩岸種茶味香美百丈皂蛤潭在縣東三十里有風雨雲雷四潭

忠義潭在永新縣城南抱陂渡元兵破城八姓勤王弗克相率赴潭水死故名

石角潭在永新縣東十里明劉文安定之故居潭有異

石形如硃墨硯池

金馬潭在永寧縣金溪鄉俗傳仙人乘金馬過此

牛吼灘在恭和縣蜀江口其石最險昔有嫁女者渡此
溺死劉崧作蘭舟詞以悼之

黨灘在吉水縣汭流而上三十里距廬陵界黃洲之下
水勢奔急舟人識其險有小黨灘頭大黃洲尾之語
金灘在萬安縣北六十里一名灘頭中列三洲多沙磧
長礮灘在永新縣西礮山下與短礮灘黃花灘相接三

灘之險舟人涉此計篙而數其用力節度稍一失手
即漂沒不可復救大灘在縣東馬頰廟下江闊半里
許石隙可放舟者僅數尺已下為大小木黃灘魚矢
灘畫角灘四灘相連亘三十餘里石勢險惡

石鬱瀧在龍泉縣二十五都水石險惡不可以舟其下
五十里為武陵瀧險尤甚

白鷺洲在府城東贛江中長五六里宋江文忠萬里建
白鷺書院其上徐俯詩金陵與廬陵俱有白鷺洲相

望萬里江中同二水流

琵琶洲在府城北真君山下劉公橋水繞之酷似琵琶
龍洲在泰和縣南一里有定光僧留識云龍洲過縣前
泰和出狀元明永樂間陳循曾鶴齡宣德間縣典史
曹鼎成化間曾彥後先應識縣東二里有金魚洲狀
如游魚識云龍洲接金魚泰和出相儒縣西五十里
有神童洲宋慶元五年曾戟中童子科楊萬里立此
名

青湖洲在吉水縣南三百步其上舊有宿鷗亭

魚袋沙洲在龍泉縣儒學前長二十餘丈外窪中窪形如金魚袋每秋沙涌則登科有人

五雲洲在萬安縣北贛江濱唐賈崇為虔州刺史赴闕
儀舟於此見五色雲起因名

臙脂池在府治後藥師寺前金錢池在府城南永和市
宋蘇軾黃庭堅遊清都觀戲擲金錢於池後池中開
花如金錢迴勝常葩

煉丹池在安福縣儒學前一名放生池相傳魏夫人煉丹處至今無蛙聲

金牛泉在府城小東門外劉同升品泉記云金牛寺石岸之下有清泉焉余與李房良辰月夕往往酌而飲之又云春江初泛余覓畫舫檣寺下白鷺洲邊柳陰相借客至飲以佳茗熟火旋汲可供韻人揮麈

國朝康熙丙午守道施閏章構取亭於上謂金牛泉疑即水經注金井之譌因作記且為之銘

小三疊泉在青原山中釋墨厯有得瀑記李源泉在府城廖仙源北塘有石牛自口噴出紺寒清澈

石礬瀑泉在吉水縣南二十里宋淳熙間建亭曰挂川縣東北里許普德廟之左有靈泉歲時嘗涸相傳六月二十四日為神生朝前三日水輒清冷溢出飲之者可愈疾

清冷泉在吉水縣西北六十里鹿角峰北平地涌出高七八寸大旱不涸匯於曲池俗名冷水塘溉田百餘

頃

五味泉在水豐縣西九峰嶺下俗傳張果老經此拄杖泉出如珠具五味

石牛泉在安福縣南六十里又名九女窟相傳昔有九女遊戲溺死於水太平寰宇記云大泉平田之中巨石如牛巖石若削指此

湯泉在龍泉縣二十二都可熟羊豕相近又有溫泉東坡井在府城南相傳蘇軾自儋耳還遊清都觀至米

市街失足墮溝中笑曰此地好開井如其言果得甘泉

義井一在府治西仁義坊宋相周必大鑿之以飲居民
一在府學後建州學正蕭彝翁死節於此因名

彭五經井在吉水縣西三十里相傳五代時有彭五經
者鑿此井闊二丈深倍之

仙井在永豐縣南醴泉院世傳楊仙師以杖拄地水涌
出如醴石井在縣南二十里深廣丈餘或云風雨晦

冥時見金鴨出沒其間

高家井在安福縣治東又名君子泉其水甘冽能愈疾
東閣井在萬安縣城北早則潮湧至午乃平

鄭溪井在永寧縣城西隅相傳呂仙從陳氏嫗覓湯嫗
從半里外取水烹茶酌之因言汲水維艱仙取隻碗
覆米於地囑其七日後開至期開視土陷泉湧闔城
飲之不竭

江西通志卷九

欽定四庫全書

江西通志卷十

山川

撫州府

羊角山在府治譙樓之左有石筍出土中如羊角昔傳
有童子自蜀青城山來者叩角致書而石開後人神
之扁為羊角洞天元虞集有記趙孟頫詩一拳白石
封巖穴三市紅塵隔洞門

仙臨山在府城南十五里上有集仙觀王郭二仙嘗至
此

井山在府城南二十五里黃華姑修真之所上有丹井
唐顏真卿嘗書碑記又城西二十里有石井山黃華
姑初駐此舊志云在城東者誤

仙蓋山在府城南三十里諸山之水皆西注與宜黃水
合水外之障有峰高銳如筍者曰禪和

英巨山在府城東三十五里見荀伯子臨川記今名東

巖嶺屬金谿

靈谷山在府城東南四十里諸峰連抱如障著名者曰
文印峰上祀三仙曰隱真觀山中有石門駐雲亭退
心石棋枰石古牛石南北二井其陽屬金谿其陰屬
臨川山半瀑泉春夏益壯宋曾季狸詩舊聞伯子記
已得靈谷名隱然望此州奇勝稱山靈

戚姑山在府城南四十五里相傳長安戚文秀之女修
道於此乘雲上昇後人亦呼凌雲山山上有仙壇觀

下有洗目池邱兆麟戚姑山賦序云女子同時飛昇
世皆傳麻黃戚魏魏居衡山黃居井山乃麻姑則吁
自有麻姑山名人詩賦滿焉戚姑祀典缺如索一殘
碑斷碣了不可得余既作記登高之餘復為賦之

雷公山在府城南六十里舊號大鹿山有池生碧蓮南
隅有井魏末居人李天明禱雨至古樹下遇五老人
云吾姓雷久處此井或云禱雨時霹靂從井出因號
雷公山山西南有上鹿里蓋麓字之譌也

樓撫山在府城南八十里有普潤院其碑云峰連萬疊
嶽聳千尋水繞長山岡蟠巨野相近者為繡毬山跨
臨川宜黃兩縣其北曰高田山南曰洞源嶺中多怪
石異木遠望山形有如繡毬

界山在府城南九十里西連白楊黃沙諸嶺東盡潭山
良安石門峽南接建昌等處

銅山在府城西三十里唐天寶六載勅改峩峰其南半
山有龍泉觀稍西有支院曰東林其下有小峰曰華

子岡廟祀華子期山麓有紅泉皆託諸謝詩也

龍會山在府城西四十里雙峰聳立上有曾真君壇中有四穴如馬蹄出泉清冽人呼為馬蹄泉

樟源山在府城西北三十里豐城驛道也石路峻險元泰定間豐城陸祥叔鑿平之

筆架山在府城北四十里三峰卓立如架辛好禮詩清秋山水無不宜筆架之峰天下奇又北為金山其南諸峰環抱曰金雞城東鄉延橋諸水皆經其中有觀

曰永興白玉蟾修煉處又西北數里有嶺曰差我通
道進賢又北三十里最高者曰蜉蝣嶺

免水山在府城西北六十里唐天寶間改名堯山上有
祠冕而垂衣裳者三土人曰堯舜禹也山與儲山界
接豐城

月塘山在府城東四十五里宋王安石祖衛尉墓在焉
屬金谿縣境

陳理山在府城東北一百二十里相傳漢豫章太守陳

蕃行部至此理獄訟故名今屬東鄉縣境又舉軍山據府志在城東六十里亦應隸東鄉然皆不知何山也

櫟山在崇仁縣東二十里多櫟樹又東十里為僊華山感應山在崇仁縣東五十五里有仙壇鄉民雩禱地也東塔山在崇仁縣東南五里何漢記云東塔仙壇始元至正癸未值大旱民走邑南華蓋山叩于浮邱公迎三仙像以來祀於山之麓縣西有北塔山虞集有詩

天寶山在崇仁縣東南三十里峭拔高聳為境中偉觀
又東南十里曰沸湖山唐杜光庭煉丹之所宋紹興
中山嶺夜有光旦穴之得古陶器上有沸湖二字其
下有龍潭

朝真山在崇仁縣南十五里世傳王郭二仙尋真至此
相近為玉華山又南為浮邱石有巖三中有溪可舫
勝跡良多宋尚書何異闢為山莊理宗在東宮時御
書袞菴二字賜之洪邁撰有浮石山莊記

巴山在崇仁縣南六十里有漢豫章守樂巴祠唐天寶
六載改曰臨川山以其為臨水所自出也宋紹興中
縣令孫懋避樂仙諱改稱相山上有梅樂鄧葉四真
人祠下有相泉或云樂墓亦在山麓按樂上書理陳
蕃竇武寃下廷尉自殺葬此亦疑失實

聖寶山在崇仁縣西南十里上有仙祠祠旁有石瑩潤
如丹玉又西南十五里為靈興山

芙蓉山在崇仁縣西南八十里秀麗如菡萏跨樂安境

上有葛仙翁祠旁有龍潭又西南二十五里為寶唐山

華蓋山在崇仁縣南一百十里一曰寶蓋山律宰修廣跨崇樂宜三色之境昔顏魯公按圖尋訪得隋開皇五年壞碑言晉王郭二仙自玉笥經麻姑軍峰西華等山最後過此喜而留焉修煉功成遇浮邱公於此元康二年壬子乘鸞昇去上有三仙觀上昇壇旁有捨身崖定風石金雞巖紫元洞及龍潭靈跡甚多宋

末望氣者言華蓋臨川二山之間當產異人已而吳文正澄生於山麓之咸口里明天啓七年知縣崔世名輯華蓋山志八卷

崇仁山在崇仁縣西四十里跨南昌吉撫三郡之境本名羅山晉羅文通學道於此唐改今名絕頂有石仙祠半山有田數頃泉注為池冬夏不涸蓋崇邑之鎮山也

仙遊山在崇仁縣北二里危素嘗作思賢亭於上謂吳

文正澄也後改祠吳聘君與粥

翠雲山在金谿縣南四里岡巒環合旁有瀑布宋治平
中儒士胡采發榛莽而出之有躍馬試茗鳴玉三泉
王安石躍馬泉詩崩騰赴不測一蹈常萬匹陸九韶
鳴玉泉詩清越聲盈耳羣工琢良玉陸九齡試茗泉
詩有泉生渥洼紺洌可試茗

官山在金谿縣南三十五里乃縣南第一峰其上四峰
如削下瞰清江望之如屏障

金窟山在金谿縣東五里連接銀山中有石竇即前代採金之所今廢有仙人麻鞋跡

雲林山在金谿縣東四十五里率律數百仞界撫信建昌三郡其形勢為金谿巨鎮上有峰三十六最高者為出雲峰宋建炎中忠義社鄧傳二姓團兵於此旁一峰名玉馬勢如天馬行空昂髻振鬣詳見危素雲林圖記

崖山在金谿縣東七十里又名大山南連雲林東接貴

溪之琵琶峰有龍鬚井三老峰湯家洞諸景

銅斗山在金谿縣西南二十五里與芙蓉山對峙宋曾
鞏記云銅斗山能出雲雨弭災害為一邦之望又西
南十五里曰鳴山其巔有井隨江水清濁號通江井
狀頭山在金谿縣西四十里與雲霧山相連宋徐柏軒
為教授嘗登眺曰居此山者必出狀頭因留後裔於
此

疎山在金谿縣西北五十里左有峰曰桴鼓右有峰曰

寨旗其麓有洎湖潭舊志云本梁周迪營地唐大中時何仙舟棄官讀書於此有釣臺書屋因號書山後為白雲禪師道場南唐改今名

張祉山在金谿縣東北六十里接安仁縣界雲錦志云漢天師嘗修道於此

仁榮山在金谿縣北三里有石鐘觀拳石扣之音如鐘赤松山在宜黃縣西南十里有穗珠泉小簾泉宋鄒度支極隱此自號赤松子

臺山在宜黃縣東二十里釋道全遊五臺歸結菴於此
雲華山在宜黃縣南十里亦名西華又南五里為玉華
山舊有仙壇曰石麓三面壁立惟南通一徑上有田
二頃兼有泉昔人以為寨又南五里為石砦山有石
梁突起數十丈橫空跨於兩巖夏涼冬溫旁有神運
倉滴珠巖溪旁有義泉寺宋孫覲賦石砦詩并為之
序

黃山在宜黃縣南四十里有龍潭雷公嶺其山四面皆

黃茅下有潺湲亭磨盤石又南三十里曰雙源山中有溫泉二派

鳳臺山在宜黃縣西北二十五里縣治負焉

曹山在宜黃縣北三十里舊名荷玉山其嶺曰羅漢峰昔本寂禪師因禮曹溪六祖而回遂易名山前有迴龍亭其下有三潮泉昔白眉禪師結菴山中其水一日三潮云

軍山在宜黃縣東南一百餘里峻極天表宜水出焉其

陽隸南豐縣

象眠山在樂安縣治東突起闌闌中形如眠象上有山
月堂宋令唐元齡詩慨想鶴汀鳬渚外盤桓鰲水象
溪間治西有仕山與象眠對峙治南有鰲頭山山半
出泉清冽而甘其麓皆石骨入溪如靈鰲赴海狀

青錢山在樂安縣西南里許下枕龍岡勢如疊錢故名
邑人何沂中作亭其上

鹿角山在樂安縣南二十五里高聳並峙如鹿角

石橋山在樂安縣西四十里有石巖穹窿望之如梁其
下空曠軒豁寺前有小石如牛鼻遇風動轉如輪
上硤山在樂安縣東北十五里其石圓而色白故名
金華山在樂安縣西北三十里形如覆瓢昔王郭二仙
登此山以望華蓋相顧云絕似婺州金華但無白石
為羊耳其下有金雞石

大盤山在樂安縣西北七十五里十二峰環列如盤延
袤二十里寶唐之源出焉跨新淦永豐二縣境

豐材山在樂安縣北八十里舊名麻山唐天寶中改今
名其北嶺接豐城縣界荀伯子臨川記云登之者望
廬阜彭蠡皆在其下又北曰杯山跨南昌臨江境上
有張公祠祀張柬之旁有金牛塘

桂山在東鄉縣南距長林二里許

七寶山在東鄉縣東七里迎春門面之入東數里為積
煙山半山有龍池瀑布即宋陳卒死節處其陽隸安
仁縣

五彩山在東鄉縣習泰鄉其陰隸餘干縣

橫山在東鄉縣十都雄視諸峰宋進士俞廷椿廷華世居其下御屏山在一十五都方聳若御屏明大學士吳伯宗家其下

五峰在府城中一曰青雲起於吳隅舊縣學依焉二曰逍遙三曰桐林又名蕭家嶺四曰香楠其東峰舊為卸鹽之場故一名鹽步嶺有臺臨溪曾鞏所記擬峴臺也其右峰舊有寶應寺今改為縣學五曰天慶其

西稍窪集客土為阜曰太山建東嶽行祠

接雲峰在府城南三十五里又南數里有峰小銳曰狀元又南為馬鞍又南為堯嶺嶺有汪自然仙冢石上刻一律自然親筆也

仙桂峰在府城北三十里後有雷壇嵎傳云浮邱公禱雨以桂枝插石罅中有觀曰會仙人多祈夢聞桂香者則吉明崇禎末樹忽朽未幾西巖復生一株

馬旗峰在崇仁縣北二十五里峭拔如卓旗然

卓筆峰在金谿縣西南二里形如立筆下有硯池遙對
學宮稍偏于右梅峰在縣南十五里有峰數十如簇
筍舊傳劉仙師嘗吹鐵笛呼雨其上

百歲峰在金谿縣西北三十里與崇嶺相連下有廟土
人以祀周迪明珠峰在縣北四十里山無雜樹圓若
珠綴相近有釋褐峰以劉堯夫得名又縣東四十里
有名揚峰舊志云故相陳福公葬其祖於山麓一名
金籠峰

雪華峰在樂安縣南四十里荷樹嶺之上其高十里下
有三百八十四塔又南二十里為仙女峰俗傳王郭
二仙飛昇時有侍女執旛其上

螺首峰在東鄉縣東南十里山首尖圓如螺山北有螺
首寺又縣北雄嵐峰有靈泉可愈疾

圭峰在東鄉縣二十五都相傳宋亡後謝枋得立祠以
祀故君今祠猶沿萬壽之名

萬歲嶺在府城西四十里舊傳宋隆祐太后經過指問

此山與人以萬歲嶺對因得名焉

石獅嶺在府城南八十里孤石雄峙如獅子形嶺有路西道宜黃東接金谿明成化間克山里人袁大用嘗備石甃砌創小亭以休行旅

佛跡嶺在府城東四十里中有飛來佛有二井深廣不盈尺冬夏清瑩不竭

大和嶺在府城北五十里又北十里曰小門嶺與金山相近上有王郭二仙行祠

紅旗嶺在崇仁縣東二十五里嶺有三疊如旗

上幕嶺在金谿縣東南五里未縣時設鎮於此崇嶺在縣西二十里層巖疊巘時有紫氣望之鬱蔥晴明可見南昌西山又西北十里為白豨嶺一峰秀拔

黃土嶺在宜黃縣南九十五里其陽隸寧都縣其陰黃水出焉箬嶺在縣東南一百二十餘里上多箬竹可為箭漳水之源出焉

寶嶺在樂安縣南八十里相傳里中楊氏得怪石濯於

溪水石忽瑩澈有人像遂寶之又南五里為大樹嶺其南麓隸永豐縣界嶺在縣北八十餘里其北麓界豐城

庾嶺在東鄉縣南三里一名長林楊誠齋有宿長林詩花尖嶺在東鄉縣南七都兩峰大小相對曰大花尖小花尖相近有金峰嶺視諸峰尤高太上有三仙祠民祀之以禦蝗蝻下有虎巖泉又南有船嶺其形如船黃茅岡在崇仁縣華蓋山下元虞集置邵菴精舍有白

雲今許草為堂之句

柏岡在金谿縣西三十里地堪攬勝又西二十五里為
柘岡上多辛夸有王荊公讀書堂蓋外家吳氏所居
也

龍頭岡在樂安縣西為邑城關障

烏岡在東鄉縣西南與大富岡對峙三港水流其間

黃華姑巖在崇仁縣東三十里其巖三級有泉甘冽南
壁有斧劈痕下建棲真觀龜鳳巖在縣南二十里兩

傍石勢如龜鳳中通一徑攀援可上險絕處有石室如斗

龍角巖在金谿縣東北永和鄉山巔有石對峙如龍角然一徑深入石室曠爽可坐百人相傳劉賢良讀書於此考安仁白塔記乃康定二年龍角山人劉無忌所撰疑即其人也

僊巖在宜黃縣北五里昔王郭二仙嘗問道寓此有朝真石拂霓洞遺跡宋周夢若有記

滴油巖在樂安縣西三十里石橋寺側或云昔出油今出五色水

浮雲洞在崇仁縣南十五里洞穴蕪沒不可深入相傳田家黃氏子夜寐驚魘見偉丈夫自稱回巖客令語世人曰此浮雲洞也因名又南三十五里有香城莊燕洞巖上有二佛跡泉流石罅中其石白如鍾乳

羅漢洞在金谿縣南四里翠雲寺之側

桃源洞在樂安縣南十里元人夏友蘭結廬種桃其中

錦繡谷在金谿縣治後四山青藹萬瓦鱗差景物風華
相錯如繡宋王安石有詩明王文安英世居其下

玉石臺在府城西十五里俗稱獅子石北崖有石岡勢
奮躍而南嚮曰金石臺上有林祕丞書屋今廢臺右
五峰駢聳而東漸出濱江俗稱五虎其末峯最小者
斷入江中而踞曰石臺俗稱豹石川合水壯則浸其
凹而峰若鼃浮鰲湧昔人以其關鍵風氣擬之鄱湖
兩孤云

石廩在府城東三十九里狀似倉廩可容千斛荀伯子
臨川記云廩口開則歲歉閉則歲豐今石存而不驗
石龍在府城西南二十四里巖高一丈五尺周圍六百
五十步地理志云有鱗甲因號石龍又西南十五里
有石鼓

石屋在樂安縣北四十里天授鄉三溪渡側突起一峰
其中空明

蝦蟆石在府城東南二十里石頭渡東岸徐霖詩蝌蚪

鐫文懷舊鼓蟾蜍供硯琢青瑤

鯉石在崇仁縣南十五里俗傳琴高先生於此修煉所
乘之鯉化而為石又縣西南四十里有虎跡石相傳
王郭二仙嘗跨虎憩其上

月石在金谿縣東四里翠雲院側巖竇天成宛如圓月
宋陸九韶有詩又樂安縣天授鄉亦有月石

榜石在樂安縣南五十里地名前團相傳其石光明則
有人登科甲

汝水在府城東門外源出廣昌伏村血木嶺流至建昌府為盱合新城諸水流二百里至良安峽入臨川境為汝合宜黃崇仁二縣水流至南昌界合豫章水入鄱陽湖

臨水在府城西十里源出崇仁縣巴山下即定川也亦名母城水流至西津與汝水合

連磬水在府城西北五里源出長岡過品橋歷仙臨山由西高和尚二橋出黃塘橋至合處凡四十里水比

諸水特重昔人取以充漏刻荀伯子臨川記云甘渚
出宜黃連礬山四十里流至吳家渡注汝水東興人
以木甑浸井中後於連礬橋下甘渚中得之連礬山
未詳所在據云四十里至吳家渡非今宜黃界矣俗
謠連樊因妄指為二山云

夢港水在府城南三十里源出佛容山下注汝水一作
孟港隋地理志臨川之下獨載夢水即此水也

寶唐水在崇仁縣西南一百五里源出樂安大盤山入

縣境下流合臨水

羅山水在崇仁縣西源出羅山其派有二一自暗坑出沿流入寶唐水一自東塔出沿流入大港合臨水東至白鷺渡入臨川境

西寧水在崇仁縣西五里源出華蓋山曲折流入縣西與寶唐水合又合青水與羅山水

金谿水在金谿縣上幕嶺東水色如金縣因以名

福水在金谿縣南十里源出於閩經南城梅峰至鼓樓

岡下會石門港水

清江水在金谿縣南三十里其水清冽宜漚楮故土人造紙以清江著名

青田港水在金谿縣東二十五里下流入貴溪安仁界齊岡水在金谿縣西五十里其源二一出縣北金窟山一出查堆浮羅橋

苦竹水在金谿縣北四十五里乃汝水之上流也

曹水在宜黃縣東北源出崇仁分水界雙坑流至縣北

經捲雪豐樂二橋合宜黃二水

宜水在宜黃縣東五里源出軍山之北流四十里與漳水合又百里與黃水合

黃水在宜黃縣南五里源出黃土嶺北分流至三港口經打石港與汝水合

漳水在宜黃縣東南源出箬嶺合宜水至縣郭前合黃水下流又名東港

鰲溪水在樂安縣治西源出芙蓉山東流至縣又西流

與贛水合

大溪源水在樂安縣西北七十里源出大盤山北流至蛟湖合臨水縣南又有大溪水源出華蓋山西流至烏水入永豐河

遠溪水在樂安縣南百八十里分三派至招撫合烏水三港口水在東鄉縣治東北水源有三一出雄嵐峰左經洞泉觀西平龍義而來一出珠坑庾嶺雞公嶺之間下繞縣治之東一出竹山峽入寒陂三水交會於

縣治之東北故名三港口自北而西歷珠山下流至
新陂與延橋水會出金雞城與臨汝水合

潤溪水在東鄉縣習泰鄉距縣治六十里其源有三一
自餘干之李梅峰東流而西一自鶴堂峰南流而北
一自贊王嶺西流而東皆至巖前陂合北下為潤陂
水至族湖合龍窟河水朱子集有過潤溪詩

南湖在府城南門外西折里許相傳南唐元宗弟齊王
景達所開今湮為田

瑤湖在府城東南江廣流緩渟潞如湖稍北有千金堤
白鰾潭在府城北一百里相傳宋晏殊之祖其葬處掘
得三白鰾一奔入潭故名

青水潭在崇仁縣西北十里源發十都流至縣西驢陂
與大溪水合

播鼓潭在宜黃縣南九十里山泉傾瀉入潭其聲如鼓
梅仙潭在樂安縣南五十里張右丞澈嘗曰梅仙潭石
磯出於水裔松竹森潤其源有梅百十株或徘徊其

下真瑤林瓊樹中也

黃金瀨在崇仁縣東二十里下有潭深莫可測

虎頭洲在府城北三十里宋治平中郡人李權夢張樂
送至洲上俄登第授虔州司理蓋虎頭之應也

位洲在金谿縣西狀頭山之東宋儒傅子雲嘗遊詠於
此象山先生為作記

墨池有三一在府學晉王羲之學書池上池水盡黑故
名曾鞏有記一在金谿縣距白水寺三里乃謝靈運

金匱要略卷之二十一
卷十
滌硯處又清遠驛有墨池明吳與弼有記

卧冰池在府城東孝義寺俗傳為王祥故宅張右丞詩
雖賸猶堪賞前賢況可師

靈運池在府城東四十里距靈谷山二里許池在山巔
放生池舊因汝水為之豫章詩話云唐末邕州蔡大夫
遷撫州刺史遊汝水放生禁採捕有人乘小舟釣其上
蔡使人捕之釣者為詩云投却長竿卷却絲手攜
蓑笠獻新詩臨川太守清如鏡不是漁人下釣時宋

州守朱正辭始即吳陂莊之南塘為之置斗門以均蓄洩

化龍池在崇仁縣治北宋樂史家池旁有巨蟒鱗甲爪距如金一日風雨大作化龍而去史登科正此日也仙鷺池在崇仁縣西南四十五里世傳唐道士杜仙興修黃籙齋忽有仙鷺七飛集池上又縣南有鹹池宋嘉定志云陳司空黃法氈因侯景亂於鄉里聚徒助陳高祖有功又有奇術嘗變鹽池於家山下今水味

鹹於他水

齧指池在金谿縣東二里烈女祠前唐寶曆間治監者坐鑛竭虧額將懼重辟二女痛之因發憤躍爐齧指自誓灑血於地後人因以名池

龍池有二一在宜黃縣南九十里之綿谷相傳唐大厯間邑令許渙禱雨於此有黃龍驤首而至須臾霹靂一聲甘霖大注一在樂安縣北五里兩山之間匯為池廣十畝中有穴其南五十里又有雙龍池

鏡香池在樂安縣治西亭曰鏡香蓋取太白荷花鏡裏香之句

溫泉在府城西北三十餘里明水山東麓有明水寺迤東四五里有池常沸曰溫泉東坡云天下溫泉七汝水其一也明萬厯中知縣劉孕昌建亭覆之今圯迤西五六里有池清冷曰冷泉昔人謂水有日月之象故山曰明水也

一滴泉在府城萬壽寺冬夏不竭王安石詩一滴有源

通地脈半泓無底透湘川白鹿泉在府城寶應寺世
傳謝靈運繙經時有白鹿跑地泉湧出宋陸游詩泉
聲落環珮肝肺為清涼

靈泉即五星泉在金谿縣南十里泉自石眼噴出纍纍
如撒珠也縣東二里伯清泉泉出石罅清澈味美又
有泉出石中名石眼泉寒暑如一宋嘉定間縣令樓
錡勑二亭取荆公詩扁以待霖其一未扁錡字伯清
邑人即以名泉永嘉毛鉅有記

黃蜂泉在金谿縣西三十里井寬不盈畝而泉脈星燦
多於蜂房灌田約百頃

白龜泉在樂安縣南八十里近仙遊觀昔吳真人修丹
時有白龜自山南負泉而出故名

仰泉在東鄉縣何坊山麓有池廣丈餘水由地出如珠
滾盤下流灌田甚多又有清井泉在長林亦利灌溉
九十九井在府治東南七里俗傳周迪與其夫人約曰
一夕之內爾織百縑我開百井至四更夫人百縑已

就效雞鳴以紿之羣雞皆和方得九十九井聞雞鳴
遂止鄉人因立周仙王祠

朱井在府學文廟西廡下其泉清冽

丹井有三一在府治西南魏壇觀乃魏夫人煉丹之所
一在西北元妙觀乃黃華姑煉丹所一在樂安縣南
四十里玉庭觀乃王郭二仙煉丹所

雙黃井在府城西四十里其甃乃雙黃木甃至今不朽
舊傳曾真君煉丹處鄉人立亭於上

石仙人潭井在金谿縣東二十五里有仙跡歲旱應禱
又東一十里有三龍井昔劉仙師得蓂龍術能興雲
雨井乃其遺跡也

仙人井樂安縣有二一在平湖岡上灌田賴之一在巴
塘

建昌府

麻姑山在府城西南十里建之鎮山也唐隸撫州故顏
真卿有撫州南城縣麻姑仙壇記小楷精妙久為好

事者竊去宋楊萬里記云道旁古松合抱皆二百年
物瀑泉雙流若自天下有老氏宮曰仙都者枕山而
居明鄒矩遊記云麻姑直城西十里緣山麓而上百
餘步有尋真亭又數百步有雲關益上斗折數百步
至山半俯視諸山如龍首峰赤面從姑石皆帖然出
履下山下有澗嚙石南奔十餘里其流而平布石者
如織組其擁石而下者如驅潮卷海其聲細者如響
環珮如鳴球大者如轟雷直上數十仞有水垂峽如

懸河蓋所謂瀑布者尤為麻姑竒觀上有金龍潭深
黝而正碧龍藏其中大旱祈禱輒雨澗旁為亭枕流
垂玉飛練湧雪下上聯絡如貫珠然皆因水而名又
上數百步有橋架石澗上石罅有泉側出極甘冽以
釀酒尤佳名神功稍上夸行數百步至仙都觀壇魯
公祠及何氏書房在焉觀後有唐鄧紫陽冢相傳紫
陽尸解棺亦飛去獨遺爐簡瘞壇外山皆迴環舊有
古藤七星杉皆已斬伐惟存一松偃蹇如虬龍山上

有仰高亭又有齊雲亭一碑穹然立榛莽中下瞰
城郭大僅如掌山後有霧應仙羊五老秦人諸峰盤
孳八九里又有碧蓮池在觀前今已為田由麻姑十
里至丹霞觀亦峻險水益清駛草樹益森翳觀有鐵
鑄仙像所謂丹霞洞天者去觀十餘里在山巔與萬
壽峰勢脈相屬明嘉靖癸卯知府朱廷臣彙輯歷代
詩文成麻姑集十二卷

按顏記引葛洪神仙傳云王遠東之括蒼山過吳

蔡經家後云山頂古壇相傳麻姑于此得道非謂
蔡經宅王方平會麻姑在此也舊志凡仙釋古蹟
多附會今概削

高空山在府城內一名黃家山宋侍郎聶子述居此與
郭家陳家二山相連城北二里鳳凰山相傳鳳嘗降
此

從姑山在府城東南五里上有鐵關玉井天梯天柱諸
奇勝有洞竊黑名玉洞一名伏虎洞洞中竇名玉竇

絕頂有石如枰傳是仙人弈處二江如雙虹自天蜿蜒而下真足為麻姑之從也景分十區扁額百數以飛鰲峰為最詳見羅汝芳從姑山圖序記

楊公山在府城南十里江景吳詩雲涵古木凝清爽泉帶飛花過曲灣府城西五里有仙山絕頂祠王郭二仙宋知軍陳繹與州人劉光道同遊賦詩云佳山多在郛城西草莽煙雲路欲迷

大富山在府城東五里又東五里為芙蓉山連枝疊瓣

秀若芙蓉上有三仙祠祈禱多應府城東北五里有章山喬松修竹森列交蔭

聖山在府城西南三十里治平寺左山列如屏與蛤湖相近夏良勝建志云南四十里有虎頭山

東界山在府城東二十里又城北七十里北界山與臨川縣分界

席帽山在府城東五十里上銳下闊若席帽然半山有石如人立或曰南唐保大間范越鳳擇地於此寘帽

因名

太平山在府城東北五十里其勢寬平上有棲真石

龍門山在府城東六十里上有天井歲旱應禱又東十里為九八山山勢橫列如九八字相傳山上有金錢夜露光彩飛不過尋丈搏之不可得

禪山一在府城東七十里遠望端凝如坐禪狀舊志云山側有金船遇風雨夜光景著見一在南豐縣南八十里

斂山在府城東八十里高數百仞延袤數十里淳熙郡志云藍田方言以禾囷為斂山形似之故名正德府志為劍山又有大旭山山勢高聳日出先見宋時避神宗諱改大竹山又東為魚螭山

梨甲山在府城西十餘里麻姑山嶺之北巖石層疊如梨甲形又西為銅山謝靈運詩銅陵映碧澗即此

廩山在府城西六十里高百餘丈上有大石如禾廩白雲山在府城南六十里頂有虎巖唐光化中有虎巖

師乘雲而來化於此宋楊傑詩山空師何在木末白雲起

白馬山在府城東北九十里山有出雲峰絕頂有龍潭界接金谿縣

五峰山在府城東一百二十里山有五峰故名又東為石筍山有石尖銳如筍上聳天際張孟琛詩龍苞盡向雲中綠犢角偏從雨後青

南城山在府城東南一百四十里

軍山在南豐縣西四十里縣之望也舊傳吳芮攻南粵
駐軍山下其將梅鋗祭焉禮成有雲物如士騎麾甲
之狀山上有三仙祠王母池下有水名軍港其西址
有山茶洞桃花源山之西有屏障山景致幽絕宋蔡
耒詩遠岫迴環碧四圍一峰清絕萬峰低

南山在南豐縣南與縣治對峙九日士民遊宴其上又
名登高山縣南十里有馬鞍山形肖故名又南二十
里為密石山

東華山在南豐縣東三十里上有三仙祠又東十里為
寶應山與聯珠峰相應故名

雲蓋山在南豐縣東南七十里上有靈泉左時翊詩仰
瞻近紅雲俯視小城郭

旗鼓山在南豐縣西南三十里右如展旗左如仆鼓又
西南二十里為福善山宋元豐間吳禪師號樟木者
於此坐化其山高峻與軍山對峙山頂山腰皆有菴
產茶味佳又西南二十里為石龍山山如游龍繚繞

數百丈

蕨岡山在南豐縣西四十五里山產蕨人多採之又五里為紫雲山其上時見紫雲又杜家尖山上有翠雲峰浮邱仙壇

華蓋山一在南豐縣西八十里又名金蓋山一在新城縣東南三十里峰頂圓聳如蓋宋寶祐丁巳僧惟玠至此以水飲病者多愈

金嶂山一在南豐縣西五里一在西南百里許高出雲

表與廣昌縣連界

福山在新城縣西南四十里縣之鎮山也舊名覆船山
唐懿宗賜名福船山宋大中祥符間去船字朱子嘗
講道於此祠堂在焉

日山在新城縣西隔溪水形勢峭拔日初出先見一名
天峰上有井深不可測相傳通海眼呼為日岫海門
後湮塞

國朝康熙六年寺僧掘得井欄鐫石龍泉三字知為舊

井處浚深七丈餘得水味甘而白蓋乳泉也

東巖山在新城縣東四十里上有泉竇涓涓流出雲氣常護之下有宋儒傅權草堂

大寒山在新城縣東南四十里山頂平曠人跡不到其高處最寒

旗山在新城縣東七十里高展如旗每雲興必自旗山始諺云旗山雲霧蓋其頭聖雨連朝落不休

仙臺山在新城縣西三十里峰巒秀聳林木蒼鬱上有

仙臺觀又西二十里為金籠山有至聖之裔居其下
何塞山在新城縣北七里形勢聳直下為魚山印山山
背有石壁立如人又縣北三十里象山橫卧如象形
縣西北三十里棲靈山中有石壇多靈跡

天堆山在廣昌縣東南溪中舊志云宋紹興間一夕雷
雨大作聞砂礫聲旦視之有山屹然高數丈童謡曰
天雷飛石頭一夜成高邱五十年內興公侯至淳熙
十一年何坦登進士官學士謚文定嗣後名卿輩出

西華山在廣昌縣西一里許山側有古桂一株東華山
在新興上里又有南華山去縣里許北華山去縣五
里中華山在縣東二十里其峰獨秀上有浮邱公王
郭真君祠

金華山在廣昌縣西南四十里夜有神光如金華色
翔鳳山在廣昌縣南五十里九峰相聯形若翔鳳

望軍山在廣昌縣長上里突兀萬仞俯視軍峰於其下
故名上有石巖石佛石獅石龜石錫杖石布袋石碁

磐石水簾皆天然形肖宋景定間樞密陳宗禮扁其樓曰光明堂曰觀在菴曰覺林門曰雲關以其道場傳南華之燈也相近有松花山世傳有仙鶴來巢於此其松生花如蓮

金雞山在廣昌縣安上里昔有里人見金雞逐之入穴次日復遇於後山羅之不可得乃知石竅相通盤峰山在天授鄉形若盤四面懸崖西南有鳥道側足可登容萬人元末多避寇於此大小崖山在金沙里桂

湖水繞之

金竹山在瀘溪縣東一里相近有上沸山又東數里為鄭家坪山縣南里許有石馬山又南十餘里為方家山縣東南十五里有盧廣山塔山又東南五里為五鳳山

魚山在瀘溪縣西一里以形肖得名縣北一里有平步山上有來鶴亭

六鰲峰在府城西相連者為華表峰城北有石仙峰

秦人峰在麻姑山西南與桃源相值舊傳秦人避亂於此後有樵者見之面鰲黑追之則疾如飛鳥峰下有虎跑泉泉側有玳瑁石

鍾臺峰在府城西三十七里昔有閩僧懷震遇一虎蹲視震叱之且祝曰欲伴吾修行可隨我所至虎乃緩步隨之至此峰隱焉他日以菜葉浮溪有人尋水源而入見僧踏虎而坐遂為創菴

郭僊峰在府城北三十里又府城東北九十里有銅斗

峰

逍遙樓峰在府城東七十里宋時峰鳴聞數里而李觀生焉今里名賢良里

何家峰祝家峰擊鼓峰俱在南豐縣東三十里

雞籠峰在南豐縣東五十里如雞籠狀有竅如盃以石投之礮礮然不知所止或塞之聲愈怒而竅復通又東十里為連珠峰取五星聯珠之義

望僊峰在南豐縣西四十里其峰遙見軍山祠故名宋

傳權詩嵯峨山勢傍雲天試問誰來此望僊又縣西北四十里有蓮花峰上有雷公石

五龍峰在新城縣東四十里高聳分脊蜿蜒如五龍狀又東十里為白雲峰山壁青峭時見白雲相接者為螺旋峰上有仙都觀下有梵安寺又東為烏孤峰特出衆山之表

簫曲峰在新城縣西南四十里相傳唐廣明中僧紹隆開山有靈禽飛翔其聲如簫因名

金船峰在新城縣北十五里石碇水口上有金峰寺

仙人峰在廣昌縣西三十里又縣東五十里有雙秀峰
妙高峰在瀘溪縣北三里上有菴又北五里為鵝峰

望州嶺在府城東二十里巔有巨石瞰郡城如在几席
賁家嶺在府城內富安坊近郭家山為明藩益國所平
風快嶺在府城西五里不甚高峻而虛曠洞達乘風者
快之又西五里為駝鞍嶺宋呂南公詩溪田橋畔駝
鞍嶺猶記當年志未平

僊君嶺在南豐縣揖僊門外宋曾致堯讀書之地俗傳有羽衣七人被髮自外至環坐室中故名

察銀嶺在南豐縣南三十里宋時遣使訪銀冶過此不得而罷路通廣昌

百丈嶺在南豐縣南七十里又南十里為捲嶺江閩之界盤湖嶺在縣東南八十里下有湖若盤俗呼大嶺陳平嶺在南豐縣西八十五里建志一作陳豐又名大洞隘與宜黃界連

小合嶺在新城縣東二十里相傳有陳高祖霸先墓
東興嶺在新城縣西三十里嶺西有二山一名上桂一
名新荷見宋文夢授遊山記

鵲鳩嶺在新城縣東六十里頂一小峰如鵲鳩狀又東
十里為飛鳶嶺一名悲猿嶺謝靈運詩朝發悲猿嶠
即此後人謠為飛鳶接此為杉嶺有關有驛關東屬
福建光澤縣界宋鮑照詩古驛舊名杉即此

禪嶺在廣昌縣東七里唐時有僧焚骨於上里人祠之

黃潭嶺在廣昌縣西南形家謂縣乃簿形此山如繫木
詳見曹學佺名勝志縣北里許為軍營嶺又縣西南
六十里有脩嶺界接寧都

血木嶺在廣昌縣南百二十里南豐鄉盱水發源於此
華子岡在府城西十五里世傳華子期者九江人角里
弟子得仙翔集於此謝靈運有詩曹學佺名勝志云
以康樂自注山居賦考之華岡麻源俱在始興山今
浙江紹興之上虞縣界但自顏魯公引用以來相沿

不改耳

脊岡在府城南十五里宋賢良陳仲父居此人贈詩云
每當春秋社時候萬家置酒神仙居

神龜岡在南豐縣東北五里許形若神龜相傳王文卿
尸解處縣東太平岡又名太平嶠高四五丈盤六七
里平坦無石明嘉靖末建兵營於此後廢

九里岡在新城縣北三十里盤旋九里接南城界

龍岡在廣昌縣治後俗名金榜山縣南有黃堂岡盱水

直來此岡橫抵之使其流紆折縣東北二十里有鳳皇岡

左岳在府城西四十五里又有右岳與之並峙

東山嶂在新城縣東南十五里元末邑民避兵於此

牙梳嶂在廣昌縣南十里內三穴大風出焉當寒則暖當暑則涼

鬼洞巖在府城東二十里舊志巫者劉仙師持炬自前門抵後門出宋時亦有巫持炬入半洞畏怖而反

五藏巖在府城東五十里俗稱孚子巖巖皆怪石絕頂
林木交鬱人跡罕到相近為仙人巖臨溪峭壁數百
仞天氣晴明巖中光彩動搖隱隱若一童子出沒其
間或云中有仙人蛻骨也又鑄錢巖巖中多有破壞
古錢故名

水簾巖在府城西十二里唐沈彬詩水簾巖底見龍眠
秋澤巖在從姑山歲旱應禱故名其側有定應泉

二虎巖在府城南五十里宋淳化中僧慧政因旱於巖

上曝身祈雨時有二虎伏巖畔

讀書巖在南豐縣東二里曾文定顰讀書處下有墨池
伏虎巖一在南豐縣東十里一在縣西七十里其左一
山不毛世傳甘仙師潑丹滓於此

石僊巖在南豐縣西十五里即許真人委蛻之所高百
餘丈深二十丈石上有白點如北斗形巖前為沖寂
觀

壺公巖在南豐縣西九十里紫霄觀後高七十餘丈舊

志云昔懸壺先生委蛻於巖巖高峻人跡罕到留一
榻堅若沈香風雨不脆丹竈猶存焉宋張自明遊記
云下巖中巖皆乾戶上巖允戶也則山之巔矣軍峰
插天如玉筍出其右盱江瀉漢如玉繩維其左金嶂
鷹石朋從友列如屏帟遮其前其後則山驅羊而隨
之水束帶而歸之無數也

天堂巖在新城縣南三十里嵯峨萬仞中緣一徑上平
廣可容數百人舊有天堂寺明鄧元錫嘗讀書其中

會僊巖在新城縣南六十里形如筆架上有僊壇

聖棲巖在廣昌縣西北七里後易名靜棲巖

黃土巖在廣昌縣東北十里有雷神著靈應其徑口為

燕巖石罅僅容一人入內寬廣不受風日秋後羣燕

蟄焉又東北五里為程公巖巖廣二百步林木茂盛

有僧棲息於中人莫知之歲旱忽著蒼褐立巖前語

人曰我能請雨鄉人競齋之既而雷雨大至如桶注

焉故人號曰程水桶後歲餘化巖中石刻三字係羅

汝芳筆又東五里為寶陀巖有靈泉疫者飲之多愈
觀峰巖在廣昌縣南坊里明永樂間樵者聞巖中鐘鼓
聲遂入視惟見香爐一錫杖一景泰間里人建祠於
上

大覺巖在瀘溪縣東三十里規溪發源於此

龍馬巖在瀘溪縣六都宋時其地有龍馬山房李覲聚
徒講易於此

風洞在府城南二十里丹霞觀後風所出處草木不生

龍湖洞在南豐縣西二十里內有龍潭相近為山茶洞
多產茶花冬春開如簇錦

桃花洞在南豐縣西南五十里狂風障上昔傳王郭二
仙寅夜堆結未就聞雞聲而罷去至今疊石欲墮不
墮

梯雲洞在南豐縣西九十里有石磴百餘級方至洞門
豐南洞在新城縣西四十里其洞居石崖間山嶺平闊
洞門面巽明正統間都人竹溪楊子諒拉里人李道

清秉燭入洞盡七燭尚未能窮疑懼而返相傳道南
豐縣界

芭蕉洞在廣昌縣東北三十里左贊詩芭蕉葉暗伊尼
伏躑躅花殷格磔飛

三谷在府城西南第一谷在麻姑南澗深廣數里許第
二谷在麻姑北澗多奇花異卉第三谷在麻源有靈
豐祠設夢牀夢枕祈無弗應其側為雲門寺寺後有
太霄觀又有田南田北柵前柵後雲蓋誥軸紅泉碧

澗名稱不一總謂之三谷焉

九疊谷在新城縣西南簫曲峰之東記稱泉石紛錯松檜空幽橋亭梯磴續絕而升冥然曠然

石筆在南城儒學大成殿前石隅石生如筍出地二尺許明成化間知縣李贊疑屬人為掘及丈許始信天成

石門在南豐縣東北三十里內容百家巨石為門里人藉以避寇

石籠在新城縣西三十里狀類石槽而圓其徑五丈宋王嚮有遊記舊志云在邑東者謠

紅屏石在府城西五里舊名赤面其石高百仞赤色建之印山也上有三仙祠靈響特著又名靈寶山

鼇矺石在府城東二十五里麻潭之北天色晴霽有巨鼇矺於上又東十五里有落消石謝靈運詩暮宿落消石是也今名硝石者謠又東五里有矺禾石宋紹興間石裂成四大字縱橫交錯不可識鏤板傳世有

道人視之曰此介我黍稷字也衆熟視之率以為然
自是境內屢豐又東五里有響石高數百仞其上可
坐百餘人往來笑語聲應答如響又有綿纏石其初
低小凡屬祈禱者以綿一幕纏其上今漸高大雖用
綿十倍不能布矣

磁龜石在府城南七十里池中有石似龜或曰磁也元
涂幾明羅玘皆有遊記

龍石在府城東八十里李華記云有龍驤首曝鬚於上

人或見之又東十里有獅子石首昂似獅又府城東北一百里有鼓石形似鼓腰有痕若繩繫之狀

方石在南豐縣治東諺云沙洲到方石南豐出狀元又迎盱門外有蒸餅石在石佛潭中歲歉則見形似餅里人刻天下太平四字以厭之

望夫石在南豐縣西南三十里相傳其婦因夫行役日盼望於石旁後墜死里人立望夫祠

忘歸石在新城縣福山世傳紹隆禪師於此坐禪忘歸

烏石在廣昌縣西北一里許有山無草木其色如鐵陽石在文上里其上容千百家人避兵於此因呼陽石寨又德興里有佛乳石其乳從石流出皆成佛面牛耳石在瀘溪縣法水寺前似石非石似木非木有竅涌泉深不可測

盱江在府城東門外一名建昌江源出血木嶺流六十里為盱水又二十里為巴溪又十五里為小敷溪又五里許至廣昌縣前五十里入南豐境東北流百九

十里至府城為盱江會新城縣飛鳶水入東北流六十餘里入撫州境

東江在府城東一里源出新城縣覆船山下流經落消石又流經通會橋至雙港口合盱江

龜湖在府城東五里一名嶠湖地讖云龜湖衝破狀元生宋時為黎水衝開淳祐中張淵微果登第又張昇生之年湖亦開

天湖在府城東四十里五藏巖之側一石山如禾囤仰

高逾數百仞攀躡至巔有田數十畝雖旱常稔故曰
天湖又東十里為金龜湖湖中有石潛伏如龜旱則
半露人皆見之相近有蛟湖舊志云宋時一日雷電
晦冥湖中有聲人以為蛟蜃相鬪又東三十里為龍
湖

天井湖有二一在府城西南二十里居山巔水色藍碧
可卜豐歉諺云湖水淺今年旱水滿湖禾不枯一在
南豐縣東北三十里深如井清澈而天光上下故名

天井

蛤湖在府城西南三十里有石磔百丈飛瀑淙下入湖多產蟹蛤宋治平寺碑云蛤湖石鑑是其處也

鯉湖在府城南四十里昔有雙鯉游其間其南為上湖北為下湖故又名三湖

高規湖在府城北十五里舊名聚水湖宋熙寧中付陂長灌溉高規莊官田故易名

蔓翠湖在南豐縣東門外里許本名萬歲湖湖口會盱

水

日月湖在南豐縣南十里形如日月

西湖在新城縣西四十里上有龍王廟縣北三十里有

象湖發源金龍山

桂湖在廣昌縣南七曲迴流至白水鎮乃可通舟又名

桂湖七渡

灑溪水在南豐縣西十五里源出早禾坳至官莊合軍

港入於盱

斤竹澗水在南豐縣東五十里源出連珠峰下西北流
越南城境至教家渡八十里會於盱

黎灘水在新城縣西南一名黎川明永樂間縣志謂水
自黎汾祖墓旁出得名源自福山之赤芾澗及巖嶺
下流四十里至孔家渡即今南津雙港合流至縣又
西北經落消石至府城下一百四十里會盱水

飛鳶水在新城縣東七十里一名悲猿港

九曲水在新城縣西北三十里水流九折縣西四十里

有冰壺水發源福建泰寧縣李嶺下

嶺村澗水在瀘溪縣東南五十里流下桐埠經落消石
至府城

石礧溪在府城南五十里旁有石礧水流入其中不知
所注測之益深或以木石墜而試之竟不知所出
岳溪在府城北三十里發源自岳口

荷石百丈溪在南豐縣西二十里發源自二溪口

彭武溪在南豐縣東六十里發源自何家峰

沙溪在新城縣東南二十里發源巖嶺宋傅權居焉西溪距縣西南十里發源涿流坑宋呂南公家此

學溪在廣昌縣自金嶂山發源經永興寺縈繞縣學明正德甲戌巡道胡世寧濬為二溪一自拱北門入循舊河一自外遶迎恩門至學前復合於佛流口入河與盱水會

龍溪在廣昌縣東北八十里源發高陂流入石門通汝川山水佳勝宋李山甫居之因號龍溪釣叟

瀘溪在瀘溪縣北門外縣由此名源出福建黃石口至石陂入雙港口繞縣治抵三溪而出高阜流入貴溪縣界

石頭港在府城東八里發源梓木嶺澳港在府城東四十里有二源一發日山一發韓山流至河田會合

雙港在南豐縣北五里發源自老虎窟

五福港在新城縣東十里發源福建之杉關

大源龍潭在府城東十里昔為民居龍出陷為澤又東

五里為高志潭宋元豐間有漁者沒捕魚信宿迺出
云潭中近驛路有石巖廣四五丈穴復高燥時陰晦
直入巖底遂迷所出三日乃霽巖穴映光得故道而
出治平中大水鄉人見黃龍橫於水上壅漲高數丈
潭亦湮塞又東十里有鼃潭漁者云潭深不可測盛
夏水冷如冰其中有石穴不敢近潭側有萬氏居宋
治平元年堂壁偶發一竅極深多投鐵器并藁秸畚
土築之今履其上猶瓏瓏有聲或以為鼃穴其下

謚母潭在府城東四十里巨蛇間出鱗甲爛然歲旱禱
於潭者初投紙疏必深沒隨即復浮屢有驗相近有
石壁龍潭宋紹興丙子雷震晦冥有聲聞數里經月
人以為龍吟

天井潭在府城東七十里內有龍蟠欲雨則電光先發
又東二十里為魚鱗山龍潭其深莫測人呼海眼側
有龍王廟歲旱以鐵符投潭雨即如注明成化間有
巫者主壇命兒投鐵符於潭雷雨暴至一黑犬迫兒

甚隨死焉

石虎潭在府城南半里許地讖云石虎潭填出宰相宋
曾布應之城南八十五里有界潭介在南城南豐之
間上有危全諷祖墓

金潭在府城北四十里每雷雨將作則雲氣滃翳於上
黃龍潭在南豐縣東四十里蛟龍所居歲旱禱雨輒應
小姑潭在南豐縣東南三十里其地舊名西源有石鎖
江口如石門門內復有石橫之險類小姑又濟川橋

金少府人卷十
南有南臺潭素稱險隘舟上下多預防之舊志云南
臺沙上南豐出相宋治平中建塔其上從潭中取沙
以供築未幾曾布作相

黃梅潭在南豐縣南四十里相傳里人嘗墜一木甕次
日出於京潭隔二十里水乃相道歲旱潭上雲生則
雨又南二十里為相公潭其上有伍子胥祠

九龍潭一在南豐縣西五十里歲旱水有聲必雨人以
是卜之一在新城縣南四十里有龍居之雲出必雨

擂鼓潭在南豐縣西七十里兩崖壁立夾溪中有一穴
深十餘丈圓徑數十尺溪水怒號不息其聲如鼓

塵落潭在新城縣福山東五里相傳有物如牛墜死其
中鈎引得之博物者曰塵也縣東南十里有更鼓潭
又五里有石板潭中有石板魚善汨者見之縣東六
十里有橫石潭一名龍潭宋傳權有詩

燕子潭在新城縣西南五十里桃溪瀦而成潭

米洲潭在廣昌縣西北七里相傳陰聖墓下有一洲曰

米洲歲熟則草茂歲凶則草枯又有七星潭相連如斗象

石壁潭在廣昌縣南十五里臨水石壁高三十餘丈上有海眼俯瞰之深窈莫測

鷺公潭鴨公潭俱在瀘溪縣二都出雲峰石壁四立名曰石倉從穴門入內有二潭相傳老龍潛焉

大南澗在南豐縣東南五里繞南臺下又縣南二里有小南澗發源牛頭坑

七佛澗在新城縣東四十里發源福山唐廣明元年僧
紹隆入山有七佛見故名

洪源在府城南十五里舊有小溪宋至道元年一夕水
暴發有雙鯉自民居躍出破陳家山而入江焉

鶴源在新城縣北三十里慈源寺前昔有靈鶴翱翔水
上

中洲在府城通會門外大江中春水泛漲其洲不沒地
識云洲生毛羽出翰林元程鉅夫官翰林承旨人以

為應後鉅夫孫太常卿南雲明宣德間掌制命讖復
應焉

菖蒲洲在新城縣南俗名打魚洲有橋亦名菖蒲有寺
名般若林

西池在府城西舊有清暉水心冉香碧圓垂絲漣漪六
亭宋許抗清暉亭詩亭號清暉瞰碧蓮半兼村樹半
神仙相近有鹹池種蓮藕味極美今淤塞城東十五
里有龍池

硯池在南城縣儒學明倫堂右石甃之方廣尺許深似之其清可鑑又宋碧眼泉在元妙觀前黃采有詩
雙松池在南豐縣化成寺側唐天祐間謝禪師植雙松於池上新城縣治內有濯纓池

白蓮池在廣昌縣西南五十里唐儀鳳間居民曾延種紅蓮數歲變為白蓮於花中得金範觀音像因捨宅為寺後又變白為碧

瑞泉在府治內宋知軍陳繹將還朝便坐之側泉忽湧

出故名治前有應春泉取施德如陽春之義又有仁
平泉宋紹興中叅軍沈叙達命名又張公泉在府治
南宋政和中旱知軍張宏鑿井得泉郡人感而名之
鳳山泉在府城西北其泉甘冽用以釀酒並於神功
湯塘泉在府城東八十里有泉湧出如沸湯至冬尤熱
又府城東北八十里有靈泉亦名湯泉

蓮花泉在南豐縣學前川上亭左昔人往浴聞蓮花香
氣故名溫泉在甘露寺前里人以石砌為三池冷池

雖伏如冰熱池雖臘亦沸惟溫泉可濯濯者隨意以
和冷熱有人投牲體於熱池頃刻即糜爛近泉數十
步聞硫黃氣丹泉在迎旰門外三仙祠下今湮

第一泉在新城縣西陽山下清澈不涸較他水特重有
亭額曰黎川第一泉明司空張櫟書并記

隱泉在新城縣西北四十里井有銅底水性較寒世傳
唐相鄭畋所鑿

酒泉在瀘溪縣東八里地名椒澗相傳有道士教市叟

投粒米於泉中即成佳醞隨客所飲多寡無不沾足
後道者復至以其心貪投一小石遂不復成酒

九龍井在府城南四十里井凡有九旱輒禱此

丹井一在府城南十五里乃洪崖丹井一在麻姑山仙
都觀世傳為葛洪煉丹井

孫家井在南豐縣東六里竇尺許泉涌不絕灌田千畝
義水井在南豐縣者有十皆歲旱不竭一在濟川橋頭
一在濠頭一在中巷內一在辛家路口一在館前一

在宜春門內一在護法寺一在黃泥巷一在祝家巷
北一在學後凡禱雨則十井並祭

柏木石龍井在廣昌縣南二十里每見雲霧滃然即雨
禱或不應則投鐵以怒龍必滂沛數日縣西十里有
石雲井旱禱之所

僊人井在廣昌縣塘坊之烏石峰相傳楊仙至此以杖
拄其石泉隨湧出後有疾者飲之輒愈

魚塘井在瀘溪縣一部溪中四圍皆石其深莫測

江西通志卷十